

四庫全書

史部

欽定四庫全書

文部

欽定平定臺灣紀畧卷一
一至三

內閣中書臣沈鵬覆勘

武英殿纂修中書臣彭元琬

欽定四庫全書

欽定平定臺灣紀畧卷上

臺灣古未隸中國版圖隋開皇中虎賁陳棱畧澎湖三十六島元末置澎湖巡司明永樂時太監鄭和舟下東西洋至東番其國人所居名雞籠山即臺灣地嘉靖末遭倭寇焚掠稍稍避居山後神宗末荷蘭國紅毛番遭颶風泊舟於此愛其地築城居之復築赤嵌樓與相望設市城外而漳泉商賈

往往前往漁利屹然為海外一隅區矣天啟初東
洋甲螺顏思齊寇海上福建南安人鄭芝龍附之
據臺灣自是劇盜繼起皆倚為固崇禎時熊文燦
招芝龍降而海上諸寇猖獗如故終明之世迄未
就平

本朝順治三年大軍駐汀州芝龍赴軍門降其子
成功率衆入海冒姓朱自稱曰國姓時時侵擾沿
海諸郡縣

世祖章皇帝屢勅招撫並令芝龍作書諭之成功不應議
政王等奏請發兵討之因械繫芝龍於寧古塔旋
以成功反覆誅芝龍及其子孫數人成功敗竄入
海令其子錦守金門廈門成功死錦竊據海隅康
熙十三年耿精忠反錦因襲漳泉諸郡

王師平定福建

聖祖仁皇帝命將討錦先取海壇諸要地又拔金廈二門
賊衆大敗遁還臺灣二十年七月

特命施琅為福建提督集兵申討時鄭錦已死其子克塽
猶恃險負固大兵由銅山進發直取澎湖克塽等
窮蹙請降遂定臺灣始設立郡縣六十年四月奸
民朱一貴作亂總兵官歐陽凱率兵往捕被害臺
郡全陷總督覺羅滿保聞報自福州赴廈門討之
提督施世驃以舟師先抵澎湖同南澳鎮總兵官
藍廷珍率將佐等攻克鹿耳門乘勝攻復安平進
攻臺灣府治賊衆敗散賦首朱一貴逃匿諸羅縣

為鄉民擒獻臺灣平自大兵攻鹿耳門迄事定凡
七日遂以次安戢南路北路擒其餘黨杜君英陳
福壽江國論等咸伏法迄雍正十年閏五月臺灣
大甲西諸番不靖奸民吳福生等因糾眾為亂戕
害官兵陸路提督王郡討平之併其黨羽數十人
檻致京師伏誅臺郡以寧至乾隆五十一年十一
月復有奸民林爽文糾眾滋亂之事

乾隆五十一年十二月二十七日

丙寅 閩浙總督常

青奏言據署淡防廳程峻竹塹營守備董得魁會稟十一月初間聞有彰化縣匪徒林興文結黨肆虐騷擾地方即會帶兵役於交界處堵緝并具文派撥番社飛遞道署旋據該番帶回原文並有彰化大肚社番寄淡屬大甲社通事信內稱十一月二十七夜彰化俞知縣在大墩地方拏匪遇害彰城失陷路途梗塞不能前進等情

臣

隨飛咨水師

提

臣

黃仕簡率領本標兵一千名金門鎮兵五百

名南澳鎮銅山營兵五百名由鹿耳門飛渡前進
派令副將丁朝雄叅將那穆素里帶領臣標兵八
百名海壇鎮兵四百名閩安烽火營兵三百名聽
海壇鎮總兵郝壯猷調遣由閩安出口至淡水前
進兩路圍攻又叅將潘韜都司馬元勲帶領陸路
提標兵一千名前赴鹿仔港堵禦臣即於泉州駐
劄會同陸路提臣任承恩居中調度并委金門鎮
總兵羅英笈前赴廈門彈壓一面通飭沿海營縣

嚴密防範并咨廣東浙江等省督撫各臣於海口
要隘一體嚴查不使匪徒得以竄逸

同日福建巡撫徐嗣曾奏言本月十四日接據臺
灣鎮總兵柴大紀及該道永福移稟內稱訪聞北
路大里杙等庄有奸民林爽文王芬等結黨搶劫
撥遊擊耿世文帶兵會同北協副將赫昇額同知
長庚彰化縣知縣俞峻前往查拏帶兵駐劄離縣
城三十里之大墩汎地二十七日夜有數千人往

刳大墩營盤并於大肚溪邊聚匪截路以致信息不通南北一帶亦有匪徒糾集且聞要攻縣城鎮道等會率遊擊李中揚林光玉楊起麟等帶領弁兵即於初二日早飛赴諸羅要處分路勦捕檄調澎湖右營遊擊蔡攀龍帶兵八百名來營聽候調用現在賊勢猖獗臺灣府城兵丁不敷調用應請多派強兵分路救援等情臣查提臣黃仕簡已帶兵由廈門出口飛渡鹿耳門督臣常青亦已駐劄

蚶江與陸路提臣任承恩會商調發官兵由蚶江對渡鹿仔港進攻至省城由閩安出口直達淡水此路最為便捷亦經督臣調派副將丁朝雄那穆素里帶領官兵聽總兵郝壯猷統領進發三路官兵夾攻分頭搜捕臣現亦飛飭營縣多備火藥鉛彈雇備船隻聽候撥用但恐賊匪聞知官兵分路前進勢必四散竄匿或偷越內渡臣現飭沿海地方文武員弁嚴行截拿至臺灣向有漳泉民人在

彼耕種貿易此次不法奸民定多漳泉民人在內
臣密飭該道府明白曉諭各地保族隣人等或有
竄回原籍立即捕拿首報加以重賞仍飭不動聲
色不得稍有張皇轉致疑駭

同日福建水師提督黃仕簡奏言訪得臺灣彰化
縣屬有匪徒聚衆攻破彰化縣城等事一面委令
提標右營遊擊邱維揚先帶兵二百名渡臺確查
一面飭令挑選提標五營員弁及備戰兵丁一千

名配足軍火器械封備商哨船隻齊足臣當即力
疾親赴該地勦捕所有廈門地方檄委金門鎮總
兵羅英笈就近彈壓查省城直對淡水際此北風
當令渡往甚易隨飛咨陸路提臣及水師各鎮協
營立就近省營分續調官兵北路援勦臣直由鹿
耳門郡城南路進兵會督夾攻均奏入

上命軍機大臣傳諭常青黃仕簡任承恩徐嗣曾曰臺
灣地隔重洋民刁俗悍屢次滋事今有彰化縣賊匪

林爽文等糾衆騷擾殺害官長攻陷城池尤為罪大
惡極不可不痛加殲戮以示懲創彰化知縣拏匪被
害該縣不能嚴密防範雖失之疎懈但帶兵緝犯事
屬因公並着該督撫查明該縣如平日並無別項劣
蹟及激變情事即據實奏聞候朕降旨交部議卹至
黃仕簡甫經病愈一聞匪犯滋事之信即帶兵渡臺
殊屬奮勉可嘉著賞給荷包等件以示優眷並著於
辦理搜捕諸務外仍加意調攝勿過勞動至賊匪么

膺烏合黃仕簡到彼督率該鎮道盡力堵勦無難立
就撲滅但恐餘黨四散竄逸或偷越內渡常青任承
恩現駐蚶江一帶著嚴飭沿海口岸地方文武員弁
實力巡防最為緊要常青徐嗣曾等總須不動聲色
妥協辦理若因外洋遇有此等案件該督撫紛紛調
遣跡涉張皇轉致內地民心生疑駭殊有關係該
督撫不可不處以鎮定也

二十九日

戊辰

常青奏言於惠安途次接據泉州府

知府王右弼晉江縣知縣徐夢麟稟稱十二日署淡水同知程峻之子程必大懷取淡防同知關防赴泉求救詢據程必大稱父程峻駐劄竹塹因彰化賊匪滋事會同守備董得魁帶兵赴中港地方堵禦賊匪衆多抵敵不住現在存亡未知賊匪於十二月初七日已到竹塹肆行搶擄我恐印信被搶又因彰化已被賊踞不能前往府城只得潛赴八里坌內渡求救等情又臣差往探信之守備林

登雲稟報情節相符是現在北路一帶悉被賊匪
佔踞臺灣郡城係根本要地必先急為保護并派
撥重兵協同進勦方為得力隨與提臣任承恩悉
心籌畫即將提標挑出精兵一千二百名先由該
提臣統領仍於鹿耳門前進再派福協興協長福
等營勁兵一千名檄令叅將福蘭泰統領都司馬
元勳等帶往聽候調遣合計調發官兵已共六千
名一面再行預為調備以資策應并檄調建寧鎮

總兵鄭國卿來泉彈壓其沿海各口岸均各加兵
駐守臣於泉州蚶江廈門等處往來督察相機調
度所需糧糒事宜派委道府大員經理俾不致遲
悞

同日任承恩奏言現催督廳縣僱備船隻已於十
二月十一十二兩日趕辦數用並已挑派備戰兵
丁一千名於十三日分配登舟候風放洋現聞督
臣已自省星夜來泉一俟到日會籌妥協臣立即

登舟飛渡協同黃仕簡戮力勦洗又一應勦撫善
後事宜關係重大懇

皇上特簡重臣臨閩鎮安督辦歲事方能迅速均奏入
上命軍機大臣傳諭常青黃仕簡任承恩徐嗣曾曰此
等奸民糾衆滋事不過么膺烏合上年臺灣即有漳
泉兩處匪徒械鬪滋擾等案一經黃仕簡帶兵前往
督辦立即撲滅今林爽文等結黨橫行情事相等該
提督到彼匪黨自必望風潰散即使該提督病後精

神照料未能周到亦止可添派能事總兵一員多帶
兵丁前往協勦乃任承恩竟欲親往豈有水陸兩提
督俱遠渡重洋辦一匪類置內地於不顧之理至所
稱簡派欽差督辦更不成話督撫提鎮俱有綏靖地
方之責設一遇匪徒滋事輒請欽派大臣督辦又安
用伊等為耶從前康熙年間臺匪朱一貴滋擾一案
全臺俱已被陷維時止係水師提督施世驃帶兵渡
臺進勦總督滿保駐劄廈門調度不及一月即已收

復藏功伊等豈竟未之聞乎又據常青馳奏詢悉淡水同知程峻之子程必大彰化失陷文報梗塞情形已派兵二千二百名令任承恩及叅將福蘭泰等由鹿耳門前進會同夾攻等語與前奏大概相同任承恩本不應前往今既已渡臺亦不須拘泥回任務須實力勇往會同黃仕簡分路夾攻速擒逆匪以期剋日藏功常青仍祇須駐劄蚶江廈門一帶調度策應此時總以鎮靜內地為要

臣等謹按臺灣滋事之初止係一二奸民乘機倡亂水師提臣既督兵渡臺勦捕若果調度得宜設法擒其首惡散其脅從自可不勞而定原毋庸陸路提臣同時並往但任承恩業已起程若飭令回任未免又徒勞跋涉我

皇上既明飭任承恩渡臺之非因其既經進發仍准前往會兵勦辦迨後兩提臣遷延觀望賊勢益張特簡重臣督勦並調集黔粵屯土各兵為一舉撲滅之

計仰見

睿謨廣運初不預設成心而遲速後先機宜自然脗合
洵所謂無適無莫者歟

正月初二日

辛未

上命軍機大臣傳諭兩江總督李世傑提督藍元枚曰
現在臺灣彰化地方有賊匪林爽文等糾衆滋擾劫
縣戕官一案水師提督黃仕簡陸路提督任承恩俱
已帶兵渡臺勦捕漳泉地方緊要不可無大員彈壓

藍元枚係福建世家衆所稔悉於該處情形自能熟諳著傳諭藍元枚即行馳驛迅速前往泉州署理福建陸路提督即駐劄蚶江一帶幫同常青調度接應一切事宜以期迅速蕲事所有江南提督印務著李世傑於該省總兵內揀員暫行署理

同日常青奏言十二月十六日復接到鎮道會稟有賊匪數千圍攻彰化縣城於十一月二十八夜將城攻陷都司王宗武被害即要來搶鹿仔港笨

港一路直犯府城請撥兵救護隨嚴飭本標遊擊
李中揚千總蘇明耀魏大鵬等飛馳諸羅勦捕分
飭將弁堵截各隘口職道等督同遊擊林光玉帶
兵駐劄鐵線橋以便應援查賊匪係漳州人諸漳
二邑漳人甚多到處附從勢甚猖獗府城為全臺
根本并飭右營遊擊鄭嵩移駐彈壓等情旋又據
福興泉永道萬鍾傑稟稱臺灣典史易鳳翔執持
臺灣道印照同該道家人曹泰諸榮來廈當即傳

詢據鳳翔稱十一月二十九日賊匪攻陷彰化十
二月初六日攻陷諸羅柴大紀帶兵堵住離府城
十里之三坎店臺灣道召募鄉勇緊守府城令該
典史同家人二名來厦請救初七日夜出城配船
放洋初十日至澎湖見署協點兵赴援約十四日
可到臺灣并聞得十一日柴大紀與賊打仗大施
火炮賊勢稍退等語伏思臺灣匪徒雖易聚集滋
事但地方文武平日豈無防範何至一任蔓延竟

至莫可抵禦今經兩提臣齊赴集勦小醜跳梁自
可速期殄滅第查逆首林爽文係漳州人其附從
之徒率皆籍隸漳屬其中更難保無內外勾連情
事臺灣既屬緊要而漳泉兩郡尤為內地根本臣
惟有預設機宜倍加嚴重並於漳州連界之廣東
潮州等境移會兩廣督臣一體防範一面督催渡
臺官兵協力進勦務期剋日蕩平不使稍留餘孽
再水師提臣黃仕簡於十五日自廈門放洋陸路

提臣任承恩十四日登舟十七日乘風開駕并與
臣面為議定或竟由鹿仔港進攻或由鹿耳門入
口統聽該提臣察探賊情隨機應變又聞知府孫景
燧自十月初間前赴諸羅緝匪今諸羅失陷業已
被害查福州府海防同知楊紹裘現在隨赴泉州
即飭該丞前往署理臺灣府事務并派委正佐雜
職等員到彼以備隨時差委其餘在臺被害文武
容俟查明再行具奏

同日徐嗣曾奏言十二月十八日據興泉道萬鍾傑稟知彰化諸羅俱已失陷賊勢方張不可不厚集兵力以速蕨事現於臣標及督標水師撥兵一千五百名並調上游之建寧延平鎮營兵一千名來省以備調遣札商督臣就近酌調南澳鎮兵赴泉聽用又飛咨廣東浙江撫提各臣於附近水師營內酌撥備戰兵二三千名各於交界本境駐劄如需策應便於徵發亦可藉為聲援至官兵裹帶

口糧已分飭妥協辦理昨准督臣咨商飭司撥銀十五萬兩解赴泉州貯備緊要動用臣現飭司迅速解往并另委護糧道李振文馳往蚶江隨同督臣籌辦一切其沿海要隘口岸諄飭文武員弁嚴密截拿以防竄逸又淡防新莊巡檢王增鐔稟稱彰城已陷賊人移踞後壠現在招集鄉勇前往勦捕初八日已刺敗兵逃回俱稱塹城已失程同知被賊圍住不知著落新莊止有直街一道並無險

要可據因思艍舡距新莊五里西北兩面有大河
二道兼有淡防倉廩一座淡水都司全營兵丁俱
駐艍舡隨商同都司易連派兵分守要隘保護地
方倉廩但查淡營額設兵丁止有五百四十名恐
賊匪一至兵力單薄當即傳軍工匠首黃世恭業
戶董再興召募衆民七千餘名其器械口糧係各
舖戶自行捐備現有竹塹守備千把總三員即令其
管領鄉勇分守堵禦惟望迅速發兵由淡水八里

全進口大有濟益等情臣查淡水地方險阻為臺灣北路要區現在既有艋舺地方經該巡檢王增鏞召募鄉勇竭力保護自應迅速發兵救援即將現派備調之省兵一千五百名飭令閩安協副將徐鼎士撫標右營遊擊吳秀統領多帶軍火器械剋日由閩安出口直抵淡水協同守禦并多帶賞犒獎勵泉州鄉勇相機勦捕亦可為南路遙結聲援均奏入

上命軍機大臣傳諭常青恒瑞黃仕簡任承恩徐嗣曾
柴大紀曰常青此次所奏派兵勦捕各事宜較從前
稍有主見畧知鎮定但常青摺內稱逆首林爽文係
漳州人其附從之徒率皆籍隸漳屬其中難保無內
外勾連情事等語此等匪徒糾衆滋事無論何處民
人其從賊者即係夥黨自應按名駢戮若漳泉民人
鄉勇果能應募拒賊出力堵禦防守即係良民自應
加以獎賞不應預存岐視稍露形迹轉致漳民心生

惶懼別滋事端此時水陸兩提督先後帶兵渡臺已
有六千餘名徐嗣曾又經派撥兵丁一千五百名渡
臺協勦兵力不為不厚但閩人性本慆輕若零星打
仗致有挫失是輕為嘗試轉足以張賊勢而餒官軍
之氣於事尤屬無益著黃仕簡任承恩務須俟各路
兵丁到齊約會日期同時併力夾攻自無難一舉蕩
事該督等總須鎮定持重再徐嗣曾奏飛咨廣東浙
江二省督撫提督於附近水師營內酌撥戰兵二三

千名各於文界本境駐劄如需策應便於徵發亦可
藉為聲援等語此時似可無需隣省接濟兵力然備
撥亦可總宜不動聲色密為佈置不可稍涉矜張驚
動衆聽至臺地會匪究係何會興有幾年聚衆數千
蔓延滋擾刼縣戕官該地方文武平日所司何事豈
竟漫無覺察並著常青於事定後查明嚴叅示儆但
非目前急務此時惟當鎮輯內地速勦賊匪為要

正月初三日

壬申

上命軍機大臣傳諭常青黃仕簡任承恩徐嗣曾曰臺
灣賊匪林爽文等聚衆滋事刦縣戕官一事前據黃
仕簡任承恩各奏俱帶兵前後渡臺進勦朕初以此
等匪徒不過一時烏合不值水陸兩提督前往同辦
嗣據常青奏黃仕簡於十二月十五日自廈門放洋
任承恩於十七日登舟開行會同進勦等語任承恩
既已同往務須與黃仕簡同心協力鎮定持重努力
勦捕若能剋期撲滅迅速歲事是即有功而無過朕

必將該提督等加恩獎賞其出力員弁兵丁等亦必從優議叙至昨據常青徐嗣曾等奏到各摺內稱總兵柴大紀帶兵堵住離府城十里之三坎店召募鄉勇緊守府城十一日與賊打仗大施火炮賊勢稍退是現在府城業經嚴密防守可保無虞俟大兵到齊同時并力夾攻自可即日蕩平所有首夥各犯拏獲之日即在該處迅速正法一面奏聞毋庸再行分別請旨辦理致滋耽延

臣等謹按兵貴一鼓作氣方水陸兩提臣會同進
勦若俟各路官兵到齊約會日期同時并力夾攻
則賊衆胆落自成破竹之勢

皇上於進兵之始早慮及閩人秉性慄輕勇於私鬪怯
於公戰豫以不可零星打仗輕為嘗試丁寧

訓誡至於再三厥後黃仕簡任承恩等惟事分路堵禦
兵力見單士氣不振以致重煩徵調益仰見

聖明坐照如神寔為洞燭幾先也

欽定平定臺灣紀畧卷一

欽定四庫全書

欽定平定臺灣紀畧卷二

正月初七日

丙子

常青奏言彰化賊匪林爽文等攻

佔城池先經

臣

派撥三路官兵赴勦惟是調往官

兵雖有六千內水師提臣黃仕簡帶領本標及調

取南澳銅山等營守兵共計二千數百名其由閩

安出口派赴淡水之官兵一千五百名

臣

于十二

月十三日據淡水同知程峻之子程必大稟報竹

塹地方亦被賊人佔踞因飭領兵之海壇鎮總兵
郝壯猷相度情形非于新莊堵禦即赴南路應援
而鹿耳為臺地咽喉尤須厚集兵力庶可近護郡
城遠赴攻勦茲臣復添派督撫二標兵一千名檄
令原任閩安協副將徐鼎士帶領由省城南臺口
配船又調福寧鎮并桐山羅源等營兵一千名檄
令福寧右營遊擊延山帶領于福安縣白石口配
船俱從各該處出口候風直渡過臺經由鹿耳門

進口交與水師提臣黃仕簡聽其調度俾軍容益
昭壯盛賊匪尅期殄滅臣一面仍再于各營兵丁
內預為挑備酌量機宜隨時策應

同日浙江巡撫琅玕奏言臺灣賊匪滋事先經督
臣常青咨會臣即飛咨提鎮各臣並飭沿海各營
及地方官嚴密防範毋致匪徒內竄再於接壤之
江山縣起至嘉興府屬出境止酌添腰站馬匹驛
夫以速郵報茲又准福建撫臣徐嗣曾咨會于附

近水師營內酌撥備戰兵二三千名配齊器械在
交界本境駐劄以便徵發亦可藉為聲援等因查
浙省温州府地方由海至閩省之廈門最為捷近
自應于附近之水師營內酌派現在飛咨提鎮各
臣即於提標同温州黃巖二鎮標所屬營內共揀
派練習兵三千名配齊器械攜帶糧餉在于本境
交界之處駐劄以待徵調其應派將備帶領前往
一切事宜現咨提臣陳大用酌定具奏

臣仍檄飭

溫處道陸瑗隨同鎮臣在彼彈壓此等匪徒均係
一時烏合之衆現當閩省官兵合剿不日即可殲
盡其匪黨自必四散避遁各海口均關緊要臣已
分委道府等官酌派兵丁實力盤查截拏俾無竄
逸均奏入

上命軍機大臣傳諭常青黃仕簡任承恩徐嗣曾琅玕
曰從前勦捕朱一貴黃教二案調兵若干名該督自
有成案可查今常青既令任承恩帶兵由鹿耳門前

進又復加調官兵陸續渡臺並咨會粵東浙江酌備戰兵以資策應臺灣常有糾衆不法之事此次常青等何以張皇畏懼至此徐嗣曾亦有移咨鄰省一體預備之舉而琅玕此奏尚有主見不至過于惶遽著傳諭該督等務宜鎮定妥辦不可張大其事使沿海民人心生恐懼於地方大有關係至常青摺內稱探得澎湖兵於十二月十四日到臺郡安平林遊擊亦帶兵赴援現在賊勢稍退等語郡城防守嚴密全臺

根本尚不致有他虞黃仕簡等務須俟各路官兵到
齊約會日期同時併力夾攻自無難一舉蕺事勦捕
淨盡常青徐嗣曾琅玕尤宜嚴飭沿海文武員弁截
拏逸回匪犯毋使一名倖脫

初八日

丑

常青奏言前派赴淡官兵因聞竹塹已

被賊踞旋又據巡檢王增鐔稟報於艋舺地方召
募鄉勇人等設守隨又密飭統兵之總兵官郝壯
猷相度情形非於新莊抵禦即赴南路應援今該

撫臣又經派兵一千五百名前往實為緊要得力
惟是臣續調之督撫二標兵一千名已派令副將
徐鼎士帶領而撫臣所調之督撫二標兵一千五
百名據稱亦派該副將帶領實緣省城距泉相隔
數百里同時調派以致闕會不及至查督撫兩標
除派撥防守外統計備戰兵四千四百名現在派
出之數已共三千三百名會垣重地尚須駐兵留
守據撫臣札稱復調上游之建寧延平鎮營兵一

千名來省以備調遣應俟該二處兵丁到省即留
於會城駐劄其撫臣所調之督撫二標兵一千五
百名即令副將徐鼎士帶領前赴北溪臣隨改派
在省之延平副將林天洛帶領臣續派督撫二標
兵一千名仍遵前奏由省城南臺配船飛渡經由
鹿耳門進口隨同水師提臣黃仕簡協力進剿
同日徐嗣曾奏言臣以淡水地方緊要即將派備
之省兵一千五百名飭令閩安協副將徐鼎士臣

標遊擊吳秀等統領尅日進發連日接據甯江通判陳惇廈門同知劉嘉會稟報查訊鹿仔港回棹商船鹿仔港亦有泉州興化廣東客民各用布書寫義民字樣共相守護等語復准提臣黃仕簡亦因王增錚稟報咨會撥兵救援臣現已雇備船隻添派督標都司朱龍章護水師營叅將羅禮璋隨同副將徐鼎士等迅速領兵前赴正在候風遄發接准督臣來咨於未接臣咨之先督標撥兵六百

名臣標二營撥兵四百名交副將徐鼎士統領由

閩安出口至鹿耳門協勦等因查淡水新莊等處待援既急而鹿耳門一路誠如督臣籌酌尤當厚

集兵力臣前摺奏明預調延建兵一千名原以備

督臣調遣之用與督臣所調兵數適相符合應即

飭令赴泉聽候督臣派員統領赴鹿耳門進勦查

廈門對渡鹿耳門較之由閩安出口更為便捷臣

飛札廈門速備船隻該兵到廈之日即可飛渡

同日浙江提督陳大用奏言接准福建撫臣徐嗣
曾咨會浙省水師兵內挑撥備戰兵二三千名前
往交界處所以備調遣温州黃巖二鎮各撥兵一
千名尚少一千名于提標及所屬水師兵內酌量
選撥并將一切戰船軍械妥協料理等因臣隨選
派標下右營兵五百名附近之鎮海營兵五百名
共足三千名之數委派署右營遊擊俞世盛左營
遊擊裴起鰲馮颺鎮海營叅將白國樑右營守備

江得勝署守備張殿魁並千把外委三十員于十
二月三十日帶領起程赴閩浙交界之平陽縣屬
北關洋面處所以為聲援並即飛咨督臣常青酌
量調用再查有溫州鎮總兵魏大斌瑞安營副將
詹殿擢均由福建臺灣水師陞補來浙彼處情形
素所熟悉隨派委該鎮將作為總領統率前往其
溫州地方界聯閩省現飭樂清協副將李長庚前
往彈壓稽查至寧波沿海口隘均關緊要現在臣

會同寧紹台道印憲曾選派員弁時刻留心稽察
分路查緝截擊均奏入

上命軍機大臣傳諭常青徐嗣曾曰總督統轄營制全
省兵弁凡有調遣自當聽督臣主政巡撫雖亦有封
疆之責不得稍存膜視但調發兵弁應札商督臣公
同檄調况無迫不及待之情形也此乃國家體制不
可紊越今徐嗣曾惟恐毫無調度跡涉推諉是以紛
紛徵發以見留心努力並咨會廣東浙江等處挑備

戰兵預資策應使本省兵弁號令兩岐事權不一且
省垣重地自應多兵駐守今輾轉更調亦非慎重根
本之道該撫于此案初起時尚能鎮定其後何以冒
昧若此但究屬為地方起見尚無大咎亦不得因有
此旨過于畏葸而置要務于不問且督撫因此或致
不睦更于公事無益徐嗣曾惟當與常青彼此和衷
籌酌機宜協同妥辦以期迅速嚴事至該督等摺內
所稱鹿仔港等處有客民義民共相糾集守護地方

等語該處商民等激發公義保護地方甚屬可嘉著
該督撫俟事竣後會同查明分別獎勵

初十日

乙卯

上諭內閣曰臺灣奸民林爽文等糾衆滋事一案該督
常青勦捕逆匪一切調度堵禦機宜辦理尚屬鎮靜
妥協現在水陸兩提督業經渡臺會勦逆匪自無難
立時撲滅惟是海疆重地將來善後事宜均須妥協
籌辦常青係初任總督恐未能料理裕如李侍堯久

任封疆雖於軍旅未嫻而辦理地方事務于輕重緩急機宜較為熟練李侍堯著調補閩浙總督即馳驛前赴新任湖廣係腹地省分且地方寧謐無事常青自能勝任即著調補湖廣總督俟李侍堯到閩接印後常青即來京請訓再行赴任現在李侍堯自京啓程常青到楚往返尚需時日李封年老兼署督篆恐精神未能周到所有湖廣總督印務著舒常馳驛前往署理俟常青抵任後再行回京

臣等謹案林爽文糾眾滋擾府城經該鎮道等保護無虞淡水鹿港等處又有義民幫同守禦爾時兩提督渡臺即可合兵痛勦而督臣常青于一切調度機宜尚無貽悞我

皇上先事預籌以常青初任總督恐未能料理裕如特命李侍堯調任閩浙委以內地諸務令駐廈門用資經畫厥後總兵郝壯猷失守鳳山退回府城而黃仕簡病中昏憤人心未免驚慌次日常青即抵府

城郡治得以無慮兵民咸獲安堵若非

聖主知人善任算秉幾先則鳳山一失郡城必至失守
迥非常情所能窺測萬一也

上又命軍機大臣傳諭常青徐嗣曾曰常青甫經擢用
總督即遇地方有此等案件亦其年運所致會逢其
適但伊於辦理此案尚無不合惟是事定後一切善
後要務均須妥協籌辦常青究係新任恐未能料理
裕如李侍堯久任封圻能知事體之緩急輕重是以

降旨將伊與常青對調所降諭旨俟李侍堯將次到
閩時再行發抄若不然該省一聞李侍堯來閩之信
常青必心疑獲咎恐欽差查辦意存畏懼轉致驚惶
失措于事尤屬無益常青接奉此旨固不可因調任
在即于調度勦捕一切事宜稍存觀望尤不可稍露
端倪致地方文武員弁聞總督業經更換各存弛懈
之見以致呼應不靈並傳諭徐嗣曾一體慎密諸事
幫同常青實力妥辦若稍有洩漏致文武員弁聞知

常青遇事掣肘朕必重治其罪恐徐嗣曾不能當此重戾也

同日常青奏言署淡水營都司守備易連稟稱因營兵稀少先發示招募義民七千餘人鋪戶捐備口糧器械實力防禦十二月初十日有八芝蘭賊首賴水郭穩等樹立大旂招匪千餘人遣夥吳異人即貢生吳志趙同胞叔吳尊伊弟吳淑夜游異等挺身到艚舢聲稱要帶兵前往接應借道經過

不必驚惶阻撓等語經防禦義民報知易連將吳異人等四人拏解營中訊確隨押赴教場斬首梟示同日賊匪四處蜂起新莊賊首林小文劉長芳林三奇賴欲等下鹿仔中港厝賊黨黃祖成葉山林陳軒李壬等擺接莊賊黨賴樹賴國等戶尾八里至長道坑等莊賊黨何馬何記吳三奇莊漢等各招匪千餘人俱豎立大旗佔踞各處地方民房店房男婦老幼俱被焚殺拆毀新莊衙門易連于

十二日辰刻帶領兵民先攻新莊以扼其吭守備
董得魁把總蘇陞等帶領義民五百名由艍舫渡
河直攻下莊至草店尾大街千總席榮等帶兵三
百名由草店尾河坡先斷浮橋進攻國王廟邊李
因鄭追等督率義民五百名由武勝灣進攻中港
厝監生黃朝陽林講等督率義民六百名由中港
厝分路進攻海山頭又廣省義民邱龍四林貴陽
等埋伏彭厝莊四面攻勦殺死賊匪五十餘人義

民亦被害數十人十三日派撥戶尾莊蔡才陳許
林球等率領義民三百名和尚洲莊鄭憲楊景黃
天麟趙暢等率領義民六百名大坪頂莊黃英王
倍王步雲等率領義民等進攻戶尾八里坌長道
坑等處殺死賊匪五十餘人救出同知程峻并前
任新莊巡檢李國楷兩家眷屬守禦港口十四日
同千總張正耀等率兵三百名和尚洲莊鄭享蔡
論陳唇等率領義民五百名由北投琪里岸孫立

勲黃采黃辛元黃光等率領義民等由上埤頭抵
內湖集攻八芝蘭殺賊五十餘名義民血戰餘賊
逃散奪回大旗四捍馬一匹是夜賊匪蜂擁至擺
接一帶豎立大旗紮備竹排正欲渡河時方回軍
之際立即嚴行堵禦至十五日巳刻仍同各處義
民分頭攻打擺接易連督同營兵三百名又陳必
強徐固黃世四等督率義民六百名由溪州登岸
直攻芎蕉脚千總張正耀把總譚朝亮等率領義

民八百名由加臘仔過溪攻打南勢角林賀翁滿
陳抱率領義民五百名由大坪林攻打暗坑仔等
處四面會合殺死賊匪百餘人義民被殺五十餘
人餘賊散入藤藁坑山頂等處奪得大旗鐵銃等
件又派撥石頭街莊廣東義民徐勤佳戴華元等
督率義民七百名三角湧莊龔東陳海陳誰李恍
等督率義民七百名合攻枋仔林分投殺賊賊巢
盡行燒燬但賊匪雖皆奔散現在復聚暗坑仔等

處不時出沒艤舳一隅之地兵民力竭難以抵敵
望速發兵由五虎門赴八里坌口進剿現獲賊匪
劉長芳賴吞鄭昌盛蔡洪賴欲等五名已經囚禁
嚴行訊供另稟等情竊思小醜竊發竟至四路響
應是其蓄謀不軌必非一日其所稱天地會名目
尤屬不經是否與諸羅匪犯楊光勲等所設之天
地會暗樹黨援互相勾結應一面蕩平惡孽一面
嚴切跟求務期水落石出至該署都司稟稱義勇

殺賊事宜如果屬實尚屬奮勉勤事臣已飛檄曉諭務須共明大義志切同仇毋為賊衆搖亂至臺灣郡城為根本重地雖經探聞澎湖副將等帶兵赴援賊勢稍退而水師提臣黃仕簡計此日已可前抵鹿耳陸路提臣任承恩于十四日自蚶江登舟十七日開駕抵口天氣陰雨海道難辨不能前進二十日復起風暴連日猛烈難以放洋一俟風定立即飛渡現在兵力雖已厚集恐尚有隨宜應

變之處臣密為挑備以資策應務期膚功速奏以靖海氛奏入

上諭內閣曰林爽文于光天化日之下胆敢糾眾戕官佔據縣城實屬罪大惡極法不容誅該署都司易連于賊夥吳異人等前往助賊時即擒拏斬梟以安民心所辦甚屬可嘉易連俟事竣後著該督給咨送部引見至該處生監商民激發公義糾眾攻殺賊匪保護地方實可嘉獎著該督等查明分別旌賞以示優

獎其義民內有被賊傷害者並著該督等于事竣後查明具奏照陣亡兵丁之例一體議卹

十三日

壬午

兩廣總督孫士毅奏言現在提臣黃仕

簡帶兵渡臺督勦粵東與閩省水陸緊接查拏堵截更應格外加嚴現已密派妥幹弁員于各隘口商船漁艇往來處所改裝易服梭織遊巡不露圭角遇有形迹可疑之人立即盤詰究辦以絕奸匪鬼蜮伎倆至南澳一鎮與厦蚶地方互為犄角提

臣黃仕簡移咨南澳鎮臣預派左營戰兵三百名
以備調遣臣恐兵數太少不足以壯軍威臣現于
附近閩省各鎮協營內共挑選水師戰兵一千名
配定戰艦備足軍火器械裹帶一月口糧並派撥
得力之統領將備員弁一一料理停妥設有徵調
便于立即起程以資策應此外再于戰兵內挑選
水師五百名陸路一千五百名共二千名預備調
遣再查潮州府與閩省接壤聲息相通自潮州至

廣州府省城尚有一千二三百里臣恐在省得信較遲除咨會署提臣彭承堯先赴潮州稽查彈壓臣將督撫兩署事務于數日內畧為料理即親赴潮州駐劄以便遇有防範徵調事宜即可就近辦理以期迅速省會現有將軍都統同城臣今藩臬兩司隨同督察足資料理奏入

上命軍機大臣傳諭孫士毅曰閩越境壤毗連臺灣賊匪糾衆滋事孫士毅接准咨文派兵前往預備策應

及嚴飭各隘口嚴密盤詰此係當辦之事至孫士毅
係鄰省總督止當鎮靜地方堵拏逸犯豈得輕離省
城以致粵東內地民心懷疑惑外省各督撫遇有
此等事件每以親身前往見其急公而不權事理之
輕重緩急孫士毅此時如尚未起程即毋庸前往若
業已起程亦即速回省

同日徐嗣曾奏言前預調建寧延平鎮營兵一千
名來省以備督臣調派據准督臣咨會於督撫二

標派兵一千名令延平協副將林天洛帶領由南
臺配船至閩安出口前抵鹿耳門會勦建延官兵
即留於省城駐劄等因查延平兵五百名業經到
省建寧離省較遠所派官兵現尚未到臣即照督
臣咨會於督標內派兵六百名臣標內派兵四百
名備齊船隻由南臺開行至閩安候風放洋其延
建兵到齊之時即留省城駐劄再查淡水新莊等
處現已據都司易連稟率勵義民奮勇勦殺賊匪

雖暫奔散現在復聚暗坑仔等處請速發兵進剿
等情查總兵郝壯猷所帶之兵近准督臣札會催
令仍赴淡水救援及臣所派調閩安協副將徐鼎
士帶兵前後進發是淡水一路兵勢已為壯盛一
渡八里坌進口便可得力臣仍另遣熟諳路徑之
小船往來探報奏入報

聞

十四日
癸未臺灣鎮總兵柴大紀奏言本月初六日

賊匪佔據諸羅分路來犯郡城臣于初七日拿獲
奸細林馬一名嚴審供出賊匪分二起一自諸羅
山下茹苓來犯府城北門一在笨港將營盤燒燬
知鐵線橋一路有官兵駐劄難以經過隨往海邊
拏小船由海道來犯府城西門等語臣相度形勢
惟有鹽埕橋地方可以截拏水陸兩路一面將該
犯林馬正法一面飛飭在城文武員弁嚴守城池
并飛飭臺協水師多撥哨船沿海堵禦臣即督率

官兵飛馳鹽埕察看海邊一帶已有小船數百隻
浮水而來俱係賊匪飭令弁兵施放鎗炮被母子
炮打沈小船數十隻餘船遠逃又見遍野賊匪萬
餘蜂擁而至隨督率弁兵奮勇與戰初九日賊匪
被鎗炮打死者不過數十名旋退旋來全無畏懼
初十日復來自已至亥賊匪被大炮打死者約四
五百名被牌鎗打死者約二三百名生擒賊匪二
名即行正法賊匪稍退因在黑夜就地劄營十一

日卯刻復來攻犯大營賊以綿被透濕遮牛車上
向前當我鎗炮牌鎗鉛子不能入施放大炮始能
打透牛車賊匪不能抵當打死甚多於未時稍退
旋散而復聚又復蜂擁前來臣鼓勵弁兵奮勇力
戰賊匪被鎗炮打死者亦多生擒賊匪六名立即
正法奪回母子礮二尊並器械火藥鉛子甚多大
紅旗一面寫順天二字餘賊前逃追至木柵二十
里外天黑收兵十二日早賊衆數萬復三面擁至

官兵施放鎗炮打死賊匪約有一百餘名自卯至
未賊尚未退守備邱能成打死騎馬賊一名又臺
灣知縣王露帶義民七八百名亦來助戰我兵益
振打死賊匪二百多名賊衆畏懼始退但彼衆我
寡又值黑夜海霧濃布不敢前追十三日五更飭
令守備邱能成外委蔡開祥帶兵三百名潛往離
營盤十餘里之大穆降埋伏候營盤炮響即轉攻
其背已刻遠見賊果復來當飭官兵不許先放鎗

炮俟賊漸近營盤臣隨放號炮督率官兵併臺灣義民齊力向前兵丁賴連陞首先過橋放鎗打死一賊各兵隨齊放鎗炮邱能成帶兵亦經殺到前後夾攻打死賊匪百餘名殺傷騎馬賊一名賊皆四散奔逃查賊匪林爽文等係漳州人諸彰漳民所到附從且臺屬原有遊手棍徒名為羅漢脚從賊搶掠所以猝然數萬雖連日打仗被我兵打死千餘名尚不及十分之一臣鎮守海疆失陷城池

罪無可逭惟有奮不顧身力圖恢復誓不與賊兩
立又接臺灣道永福札稱鳳邑叅將瑚圖里于十
二日聞知賊匪有攻打鳳城之信即帶兵三百名
劄營城外十三日天明有賊匪二千餘名直攻縣
城瑚圖里施放鎗炮僅斃賊五六人賊勢稍退瑚
圖里放馬直追賊匪乘虛由龜山北門撲入城內
斯時官兵鎗炮莫施旋即潰散瑚圖里縱馬由南
而去不知下落賊人進入縣署該縣湯大奎自刎

等情隨飭澎湖協水師遊擊蔡攀龍帶兵七百名城
守右營守備邱能成帶兵三百名前往南路勦捕
以復鳳山臣仍劄鹽埕橋截拏北路賊匪再相度
形勢自鹽埕橋以北平原百有餘里大小村莊星
羅密布俱蓄荊竹為圍賊衆奔逃諒必散匿各莊
若我兵乘勝直前彼四處潛聚出而截我後路來
攻郡城更屬可慮臣督率官兵各處搜捕務使各
莊俱無賊匪潛藏即便長驅以進恢復諸彰二邑

賊勢雖甚猖獗不過烏合之衆臣惟有竭盡駑駘
以圖殲滅醜類奏入

上命軍機大臣傳諭常青黃仕簡任承恩徐嗣曾柴大
紀曰此次柴大紀與賊打仗奮勇得勝尚屬可嘉北
路賊勢蔓延鹽埕橋係水路扼要之區該鎮自應仍
在彼督率勦捕未便遽回郡城以致賊人踵後且南
路既經該鎮派撥澎湖協及城守兵丁共一千名前
往諒亦足資抵禦至林爽文等輒敢豎旗結會並用

鎗炮攻犯城池竟屬有心謀逆此皆由從前辦理械
鬪各案該地方官等止期就案完結將就了事並未
徹底嚴辦以致刁民肆無忌憚釀成巨案此次惟有
痛加誅勦以示懲創斷不可使一名倖逃顯戮但此
時不可稍露端倪使賊匪自知必死負隅固守轉于
攻捕無益總之助賊者即係亂民法無可貸其不肯
從賊及幫同官軍出力者無分漳泉俱係良民自應
一體獎勵使賊勢日孤易于竣事

欽定平定臺灣紀畧卷二

欽定四庫全書

欽定平定臺灣紀畧卷三

正月十五日

甲申

常青奏言十二月二十七日接到

署守備陳邦光兩稟一稱林典文等於十一月二十七夜搶劫大墩營盤遊擊耿世文等全軍俱陷二十九日即攻入彰化縣城知府孫景燧理番同知長庚前署彰化縣事俸滿同知劉亨基署典史事鹿仔港巡檢馮啟宗北協中營都司王宗武及

弁兵數十人俱被殺害復來犯鹿仔港并分擾淡水諸邑賊黨蔓延難以抵禦懇即興師救援一稱十八日有咳哈等庄賊匪謀犯鹿仔港陳邦光傳會泉粵義民預先埋伏隨令義民百餘誘賊至埋伏處所兩頭夾攻殺賊百餘名焚燬咳哈湍仔內灣二八水等處賊庄又約牛馬頭等庄義民於二十日辰刻由沙轆進攻水裡大肚茄投等賊巢并率義民襲後追逐至貓霧揀賊匪退踞烏日庄緣

該處有大溪阻隔不能飛渡各等情又於十二日
午刻率同各義民從鹿仔港抵彰賊匪聞知隨出
西門外施放鎗砲陳邦光令義民分為兩隊攻殺
賊人退走當即擒獲執旗之偽副元帥楊振國偽
協鎮高文麟偽先鋒陳高偽辦理水師軍務楊軒
等四名殺死賊夥百餘名奪獲馬二匹砲位刀械
八十餘件餘賊四散奔逃陳邦光入城查看有叅
革前任彰化縣知縣張貞生丁憂典史李爾和教

諭王梁訓導陳琬被竊未釋并居民舖戶受困在
內因彰城逼近賊巢民心驚惶各義民又無糧食
可支難以駐劄隨護衛受困官親及居民男婦一
同回至鹿仔港保守又將擒獲偽官楊振國等四
名押回鹿仔港裝入檻車交丁憂典史李爾和受
傷之北協外委許瑪分撥兵丁配船解送泉州聽
候勘訊又續據陳邦光稟稱二十三日林奕文黨
羽陳泮吳領等燒燬泉粵民庄隨率義民前往追

捕殺死賊夥三十餘名拾獲紅旗器械四十餘件
查陳泮吳領與林爽文同惡相濟均應一併勦滅
以絕根株但南北投虎仔坑等處阻隔溪河必得
三面夾攻方能克勝今各義民俱肯奮力捕匪惟
因利器無多且鹿仔港地方距虎仔坑尚有七八
十里現在鼓舞衆義民同守鹿仔港彰城一面出
巡查捕等情查該署脩節次撲捕賊匪及義民等
同心協力俱屬奮勇可嘉候分別查明請

旨優獎據解逆犯四名臣現委員飛赴迎提即於泉州
審明辦理再查漳匪作孽泉粵之人素與為仇到
處俱有義民共相抵禦不獨現在足資保護即將
來收拏匪犯亦可得力臣於淡水鹿港鹿耳俱已
發有簡明告示派員分赴各處遍貼曉諭以勵衆
志而固人心至水師提臣黃仕簡自金門收泊料
羅續於二十八日又自料羅放洋計期兩三日內
即可前抵鹿耳陸路提臣任承恩係由蚶江出口

亦於二十八日放洋旋因風雨驟作寄泊臭塗澳
外該處與鹿仔港相對一俟風定即可揚帆直達
惟是賊情猖獗到處蔓延自澎湖至鹿耳門係屬
臺郡咽喉尤宜厚集兵力臣前經續調督撫標兵
一千名原令由南臺出口前往鹿耳以備策應第
恐海道紆迴風汎難定適預備之延建兵一千名
亦已分起前來因令督撫標兵仍駐省城防守將
延建兵一千名派委延平協副將林天洛管帶由

陸路兼程赴厦並派先經調來之汀州鎮總兵普
吉保統率登舟又於水師提標五營內預備兵丁
六百名派令興化協副將格綢額帶領亦從厦門
配船飛渡均由鹿耳赴臺隨同水師提臣協力進
勦至續派之福寧鎮及銅山羅源等營共兵一千
名亦催令陸續繼進奏入

上命軍機大臣傳諭常青黃仕簡任承恩徐嗣曾曰賊
匪敢用鎗砲攻犯城池罪大惡極不特首惡之父兄

妻子應行緣坐即如現在拏獲之楊振國等四犯俱
曾受偽職並與官兵抗拒者亦應一例緣坐該犯等
係漳州民人其家屬想仍在內地若此時遽行查辦
恐漳民聞而生駭轉多未便著常青侯楊振國等四
犯解到時訊明各要犯家屬下落密為存記俟黃仕
簡等在臺搜捕賊匪事竣大兵撤回時按名查拏辦
理自無虞其免脫漏網至署守備陳邦光督率兵民
殺退賊衆並擒獲賊目解送內地審辦尚屬奮勇可

嘉著常青於事竣後查明給咨送部引見其義民鄉
勇等亦著分別旌賞以示獎勵至賊匪滋擾鳳山時
叅將瑚圖里乘馬追賊轉被賊人乘虛撲入城內兵
丁衝散瑚圖里由南而去不知下落是該叅將之不
能抵禦賊衆由於兵散與臨陣退縮者不同此時尚
可不治以委城而去之罪若該叅將能收集兵民再
行出力殺賊則其功罪足相抵統侯常青於事竣後
查明具奏到日再行核辦其知縣湯大奎雖未能堵

賊守城但既經自刎究屬可憫亦應查明議卹至黃仕簡與任承恩因海洋風色不順難涉險輕進朕亦不責以遲延計此時各路大兵俱已早到黃仕簡等務宜督率兵弁分路會勦奮勇勦賊速奏歲功

上又命軍機大臣傳諭李侍堯曰謀逆首犯與各要犯家屬均當一律緣坐但該犯等俱係漳州民人其家屬想仍在內地著將常青奏到之摺并所降諭旨抄錄一分寄與李侍堯閱看以便該督到閩時遵辦其

署守倫陳邦光如何出力及叅將瑚圖里作何下落之處如李侍堯到彼常青未及查辦著該督查明分別具奏

十八日

丁亥

孫士毅奏言聞臺匪糾衆滋事已將調

撥弁兵等事料理停當魚程赴潮並密札該處鎮將等暗行訪查凡在漳泉等處游食民人有回潮形跡可疑者一面盤詰一面拘管無許輕易釋放奏入

上命軍機大臣傳諭孫士毅曰現在臺灣勦捕賊匪即有粵東義民在彼幫同官兵出力殺賊者此時如有回潮民人正係不肯從賊及避亂回籍之人該督應令地方官收恤安撫何得轉令拘管不准釋放是毆良民轉令從賊更屬不成事體著傳旨嚴行申飭該督係軍機司員出身曾經隨同出兵非若未經軍務者可比乃於事體輕重毫無定見適足為朕所輕矣孫士毅當於該處明白曉諭以此事辦理錯悞現奉

諭旨訓飭所有回潮民人仍俱各安生業毋許拘管
俾該處民人安居樂業不致驚疑設遇有漳州臺匪
餘黨竄匿粵省自應訪拏究辦

臣等謹按督臣孫士毅因搜訪逸匪並令遇有回
潮民人概行拘管止知緝捕為亟而不覺失於太
過設臺灣被難之人聞信不敢回籍誠如

聖諭良民或轉致從賊更復成何事體蒙

皇上傳旨嚴飭並明示以回潮之民正係不肯從賊其

避難回籍者應令地方官收恤安撫

聖慈寬大如覆載之無所不容粵庄義民等所由聞風
感勵協同官兵勦捕始終不懈益徵

德化之入人者深也

二十日丑已丑常青奏言據臺地文武将賊目高文麟

等管解到泉親提研訊緣高文麟楊軒素與逆首
林爽文往來楊振國即楊咏係彰化縣差役陳高
係與逆黨劉賢士認識逆犯林爽文住居彰化大

里杙庄恃其山路險僻丁族衆多平日窩賊搶竊
擾害居民並恐官府訪拏樹黨結會共相幫護凡
入會者令其對天跪地立誓並不寫帖立簿只以
舉指為號經彰化知縣俞峻訪聞差役楊咏徃拘
因林興文先曾犯竊被獲即係楊咏得錢賣放該
縣將楊咏責比收禁并訪知楊光勲案内逸犯張
烈等五名亦逃避林興文庄內該縣以各犯恃衆
負固稟知鎮道帶兵搜拏林興文乘庄衆驚懼遂

起意拒官糾合同會庄衆殺害知縣副將遊擊兵
役多人復思攻佔縣城可與官兵抵禦即於沿路
糾邀無賴匪徒三四人於十一月二十九日攻
破彰化林爽文即得縣城自稱盟主大元帥并搶
奪店鋪綢布豎立旗號書寫順天字樣其現獲之
楊咏林爽文念其從前賣放之情許為副元帥高
文麟許為總爺楊軒委辦軍務各賊即分路往攻
諸羅淡水留高文麟等帶同匪黨數百人保守彰

化旋經鹿仔港守備陳邦光並泉州義民林湊林
文濬黃奠邦許伯達等募集鄉勇同往攻殺賊衆
紛散將逆犯高文麟等四名擒獲押解來泉該犯
等膽敢從賊肆擾攻戰城池領受偽職實屬罪大
惡極不容一刻稽誅但案關大逆應請交刑部再
行確審因解送省城交撫臣徐嗣曾遴委妥員管
解並飭沿途倍加防護以保無虞其押犯來泉之
典史李爾和外委許瑪情願仍回臺地協力勦賊

將來視其功績另予優叙義民林文濬協同押犯
洵屬可嘉臣當即賞給花紅銀兩以示鼓勵並令
回臺傳示各義民共加感奮又向該犯等詰問天
地會起於何時在會共若干人據楊咏楊軒同供
天地會是五十年十二月內有漳州平和縣人莊
烟即嚴烟過臺來興起的聽得嚴烟說及起會的
根源是廣東有姓洪的和尚叫洪二房同一姓朱
的人起的洪二房和尚居住後溪鳳花亭不知是

何府縣地方姓朱的年纔十五六歲不知叫什麼名字也不知住在那裡等語臣因該犯等既經嚴烟告知起會根由宜有未得詳細之理再四詰其鳳花亭實在何處朱姓實係何名堅稱不知查該犯等狡惡異常情詞閃爍四人本籍多在彰屬其中自難保無勾連串結情事但現在該處民情尚屬寧靜若一涉張皇轉恐驚疑四起惟有密飭該鎮道等悉心訪察加意嚴防俟臺匪蕩平以次查

辦 面飛咨提臣 卽於臺地追究嚴烟下落再加
確究至所稱廣東之和尚洪二房及朱姓等尤關
緊要臣隨派心腹妥弁帶領咨文飛投廣東督撫
二臣務期不動聲色密查辦理水師提臣黃仕簡
於十二月二十九日已抵澎湖風信順利三十日
卽可由鹿耳門進口陸路提臣任承恩暨所領官
兵俱於初四日在崇武澳得有順風一齊放洋奏入
上命軍機大臣傳諭常青徐嗣曾曰常青辦理此事初

時未免稍涉矜張嗣據該督等節次奏到調度進勦
各事宜辦理漸有主見至所獲匪犯朕意本欲令其
解京今該督於獲犯審明後即請解京審辦並鎮靜
辦理各事宜皆與朕意適合不意常青竟能如此甚
屬可嘉至嚴烟籍隸漳州不難即時擒獲並著常青
於拏獲該犯後一併妥速解京前因該處善後事宜
緊要恐常青究係初任因思李侍堯外任有年較為
諳練是以降旨調任令其前往辦理此時該督惟應

督率弁兵於應行辦理之事悉行調度以期迅速藏
事朕必加恩嘉獎更不必以調任縈心稍存疑畏轉
於勦捕無益現在黃仕簡任承恩自必已到臺灣厚
集兵勢合力勦捕賊匪自無難立就殲滅一得捷音
迅速馳奏

上又命軍機大臣傳諭孫士毅曰臺灣逆匪倡立會名
戕官佔城實屬罪大惡極至所供起會根由係和尚
洪二房並姓朱的俱是廣東人朱姓祇十五六歲何

能糾衆匪徒興起會名輒敢有謀叛等事恐係洪二房依附朱姓名目從中煽誘又如從前朱一貴謀逆情事皆未可定不可不嚴行根究着孫士毅查明後溪鳳花亭究在何府州縣即將和尚洪二房並朱姓嚴密躡緝迅速查拏一經緝獲到案訊得確情即一併派委妥幹員役迅速解京歸案審辦並著飭令沿途地方一體小心押送毋得稍有疎虞

同日汀州鎮總兵普吉保奏言前接撫臣來咨酌

調汀州邵武官兵前赴汀州府屬之永定上杭二
縣駐劄聽候進剿即於汀標三營派撥兵丁五百
名自汀起行一面飛調邵武都司定桂帶兵三百
名駐劄上杭臣已前抵永定彈壓督臣調臣赴泉
密商機務隨即日起身途次復接督臣來文鳳山
縣亦被賊匪攻陷望救孔急飛調臣統領建寧延
平二處兵丁一千名水師提標兵六百名由廈門
配船飛渡鹿耳門進剿臣於正月初三日到泉查

延建官兵尚未到隨與督臣面商臺郡現在危急
不可稍待臣即於初四日由泉星馳赴廈將水提
標兵六百名先行配船飛渡其延建官兵飛催接
續赴廈渡臺統領合勦奏入報

聞

二十一日

庚寅

上命軍機大臣傳諭李侍堯曰臺灣地方自康熙年間
始隸版圖因遠隔海洋該處府廳各縣俱未建立城

垣後經朱一貴聚衆滋事平定後總督滿保曾議建
城惟時以地處海外無城雖難於防守然失之易復
之亦易是以未經建立以節煩費但該處久成郡縣
與內地無異而城圍尚相沿用竹木編插不足以垂
久遠且此次林爽文糾衆猝起縣城遂被砍破究由
荊竹不能防禦所致朕意與其失之復取既煩我兵
力又駭衆聽聞何如有城可守而勿失更為有備無
虞乎況方今國帑充盈該處郡城廳縣不過五處即

建立城垣動用不過百萬何惜而不為至建城時如該處可立窰座或用外磚內土之法如窰座不便該處遍地皆山即開採石料以代磚工更為鞏固著李侍堯於臺匪蕩平之後詳細熟商歸入善後事宜案內一併妥議勘估繪圖具奏

上又命軍機大臣傳諭劉義長麟閔鶚元琅玕徐嗣曾曰高文麟等係臺匪案內領受偽職要犯必須解京嚴行究訊盡法懲治著沿途各督撫於該犯等到境

時務須遴委妥員多派兵役小心防範迅速解京毋致中途稍有疎虞致干咎戾

二十二日

平郊

徐嗣曾奏言准督臣咨商將臣預調

之延建兵一千名及督臣續調福寧各鎮營兵一

千名俱令由陸赴廈徑進鹿耳門為提臣黃仕簡

一路接應俱經陸續到廈總兵郝壯猷於十二月

二十二日放洋副將徐鼎士等於十二月二十二

日自南臺下船至閩安屢次放洋俱被風阻臣於

初八日親赴督催該副將等已先於初七日放洋
臣親至五虎門瞭望一帶洋面並無船隻停攔閩
安等處地方緊要臣即順道將沿海各口岸逐一
履看其汛兵單少之處先經臣於省標內派兵二
百名前赴增駐以資截拏現在巡防甚為嚴密昨
據興泉道萬鍾傑稟報差探賊分南北二路攻犯
臺灣郡城適澎湖遊擊蔡攀龍領兵到臺自十八
九至二十二連日打仗得勝二十五日夜賊自北

來攻柴大紀督同護安平協林光玉等施放大砲
賊俱退避等語茲提臣黃仕簡任承恩各路官兵
先後抵臺烏合之衆自必立就撲滅特勦捕之時
若逃入臺地內山官兵長圍攻逼搜拏不患不淨
惟海洋瞬息千里倘賊匪竄逸內渡或恐漏網現
已飛咨水陸提臣及領兵鎮將一面勦殺賊匪一
面即於沿海以港搜拏賊船先行燒沉淨盡預絕
其遠颺之路而漳州一屬係賊匪原籍誠慮有勾

串連結情事臣密札該道朱芑會知府黃彬不動
聲色妥為防範復會同督臣出示曉諭以賊匪雖
係漳人其在臺滋事與原籍親屬毫無干涉惟藏
頓隱匿例應同罪將來賊匪潛逃回籍即捕獲首
報并懸賞格剴切示諭至渡臺官兵配坐戰船之
外需用商船皆係厚價催備應給兵糧亦皆動碾
食穀惟漳泉一帶民食素資臺米今商販不繼恐
致糧價稍昂現在設法招商運赴下游糴濟其過

兵處所俱飭令大員妥為經理並無絲毫擾累民間
體訪輿情各俱安貼奏入

上命軍機大臣傳諭李侍堯常青徐嗣曾曰地方偶有
聚衆滋事之處總督既經前往巡撫自當在省靜鎮
不應輕離會城以致人心疑駭昨孫士毅奏親赴潮
州彈壓今徐嗣曾復有前往閩安之奏惟知出力急
公而不權事體之輕重緩急朕並不嘉其不辭勞苦
轉為朕所鄙矣此時各路官兵自早已分頭會勦賊

匪無難立就殲滅惟竄匿賊黨恐有逃至內者當於各海口不動聲色嚴行防範截拏此則徐嗣曾應辦之事該撫務督飭所屬嚴行妥辦不可張皇疏忽如得有勦賊情形信息仍著由驛迅速具奏

二十三日

壬辰

南澳鎮總兵陸廷柱奏言前准福建

提臣黃仕簡札酌派南澳左營兵丁預備調用隨即就每營飭挑備戰兵丁各三百名預備調遣應援嗣又准兩廣總督札將先派水師一千名帶領

竟由陸路直抵廈門聽候閩浙總督調遣等因隨
即檄調署澄海協就近抵澳彈壓地方并飛飭各
官兵星夜兼程赴廈臣即於初六日戌時登舟渡
海前往廈門聽候調遣奏入報

聞

二十四日

癸巳

孫士毅奏言途次接准閩省咨會令

粵省派兵二三千名於本省交界處所駐劄預備
徵調臣思水師一項若待徵調始行就道恐海洋

風信靡常守候稽延是以擬將派定附近潮州之水師兵一千名先委將弁統領徑由閩省詔安縣陸路前抵廈門聽候閩浙督臣常青調遣此外水師五百名陸路一千五百名照依閩省來咨調集交界地方俟有徵調再行起程至碣石鎮標水師五百名南澳右營及澄海海門水師五百名分起接續前進署提臣彭承堯護惠潮道顧聲雷已於正月初八日先赴黃岡地方稽查彈壓臣即於正

月初九日親赴閩粵交界處督率照料點送出境
按照兵數每名令其裹帶一月口糧以備緩急應
用其水師一千名應得出兵分例臣於藩庫內支
項酌給統俟歲事後照例覈實報銷此外現在交
界處等候之水路兵二千名尚未赴閩每日給以
口糧其應得出兵分例暫緩給領再臣風聞有福
建泉州興化及廣東潮州之在臺貿易客民聚衆
數千人隨同官兵奮力拒賊彼此互有殺傷等因

臣即乘機出示剴切曉諭潮民俾知感動仍暗加
密訪如有潮屬民人在臺入夥從逆究出姓名即
與叛逆奸匪一律從嚴辦理緣潮郡民人在臺貿
易者頗多如此分別良歹明示懲勸庶幾將來知
所趨向并俟兵事畧歲臣即咨會閩省督撫分晰
查明移知粵省辦理再臣派撥南澳各營水師兵
一千名先赴廈門聽候調遣署提臣彭承堯咨商
請以南澳鎮總兵陸廷柱統領前往臣以南澳緊

接臺灣地方緊要該鎮未便遠離是以飛調左翼
鎮李化龍領兵仍令陸廷柱留營督率防範茲據該
鎮陸廷柱呈報先已稟知閩浙督臣自應赴臺勦
賊復准署提臣彭永堯咨調領兵之文即於正月
初六日馳赴廈門聽候等語是該鎮未接改委文
行一聞調派星速起程尚屬勇往且該鎮曾任臺
灣彼處情形熟悉軍營多一得力之人更為有益
南澳營務現有署澄海協廖光宇前往代理臣與

署提臣往來潮州黃岡澄海等處距南澳不遠足資彈壓奏入

上命軍機大臣傳諭孫士毅常青李侍堯李世傑徐嗣曾琅玕曰閱孫士毅摺內接准閩省咨會原不過令其預備何嘗有徵調之語乃該督不揆事理輕重率行派委將弁紛紛帶兵即赴廈門實屬非是辦一烏合匪犯遽行令廣東浙江江南等省紛紛徵調成何事體外省習氣非失之懈弛即過於矜張偶遇地方

此等事件率奏請親往以見其急公勉力為站脚地步全不計事體之緩急輕重及騷動地方甚無謂也試思粵省巡撫現未回任該督又遠赴潮州海疆重地關係緊要茭塘沙灣附近省垣該督如此辦理張皇萬一有一二奸匪乘勢鼓動又將何以應之乎孫士毅接奉前旨即星速回駐省城其所派水師一千名既已起身聽聞省督提調遣若事已定即令撤回其續派之兵俱着撤回本營總以鎮靜地方安戢人

心為要

臣等謹按奸民倡亂之初若地方大吏稍涉張皇
百姓易生疑懼或恐別滋事端

皇上諄諄告誡屢

諭督撫提鎮等不動聲色處以鎮靜俾良善自安所由
軍行之際閭境安堵無驚洵綏戢之至計也

二十五日甲午常青奏言官兵出口屢被風阻收泊

各澳茲據報黃仕簡於十二月二十八日放洋由

鹿耳門前進任承恩於正月初四日放洋由鹿仔港前進其由閩安出口之總兵郝壯猷及副將徐鼎士等亦因風帆不順迄今並無抵淡水信息現在福寧延建各兵亦俱接踵繼進臣并令調來之汀州鎮總兵普吉保添帶水師兵六百名由廈門出口並准兩廣督臣孫士毅派撥粵兵一千名到廈協同進剿兵力已屬厚集計此時兩提臣亦自必到臺分路攻剿至臺郡情形接據探差稟報自

十二月十八十九至二十等日賊人往犯郡城經
柴大紀同澎湖遊擊蔡攀龍等帶兵打仗屢加殲
戮城內聚集義民鄉勇協同抵敵義民並不受值
鄉勇日給錢文人心甚固可保無虞其鹿仔港一
路已據署守備陳邦光率同全粵義民殺退賊人
協力固守又淡水新莊之艋舺一帶亦經署都司
易連召募義民共相保護官兵到日義民響應自
必倍加奮勇即可剪除淨盡至內地各境俱皆寧

謚其餘沿海口岸嚴飭文武員弁實力巡查已據漳
浦縣羅澤坤稟報盤獲匪犯陳樵一名現在飭提
確究再查漳化縣俞峻係上年十月甫經抵任實
因緝拏賊匪致被戕害並無別項劣蹟奏入報

聞



欽定平定臺灣紀畧卷三

欽定四庫全書

史部

欽定平定臺灣紀畧卷六

內閣中書臣沈鵬覆勘

武英殿纂修中書臣彭元琬

欽定四庫全書

欽定平定臺灣紀略卷四

正月二十七日

丙申 常青奏言遵

旨仍駐紮江廈門一帶調度策應務期鎮靜不敢少動
聲色時飭沿海文武員弁慎密巡查并與撫臣曉諭
居民懸立重賞遇有賊匪潛逃回籍捕獲首報總
不使餘孽得以漏網又南澳總兵陸廷柱自願
赴臺勦賊固屬急公勇往但南澳地方緊接臺灣

關係緊要今粵省之兵既已派有李化龍帶領陸廷柱自可毋庸再往應飭令速回本任

同日徐嗣曾奏言林爽文本係積賊因被拏情急起意抗拒而游手無賴之徒乘機附和烏合遂多茲據報提臣任承恩於正月初四日放洋副將徐鼎士等係正月初八日放洋到臺即有先後要亦不過數日之間提臣黃仕簡係十二月二十八日放洋先由南路鹿耳門進發直抵府城計其統轄

之兵陸續已四千八百餘名兵力已厚又鹿仔港
北淡水兩路之兵接續前進雖閩人不免慄慄而
兵威愈壯三路夾攻必可蕺事至賊匪林爽文係
漳州人恐漳人因此自疑今蒙

聖明指示無論何處民人從賊者即係夥黨自應按名
駢戮果能應募拒賊即係良民自應加以獎賞不
應預存岐視臣現已札飭該道府等榜示城鄉明
白開導現據漳浦縣羅澤坤稟報拏獲匪犯陳樵

訊係賊匪遣回探聽官兵消息業經督臣常青就近提審臣以賊匪遣人探信所遣必不止一人并亦不止一處嚴飭各屬慎密查拏此後竄逃偷渡回家亦必不少並飭加意防範仍懸賞格諭令親屬鄰佑捕拏首報至一應軍行供支糧餉火藥等項督同司道妥速辦理不敢稍有忽悞又聞黃仕簡抵臺後勦捕賊匪開砲打死二千餘人賊俱星散奔逃內山合併陳明再漳浦縣知縣羅澤坤浦

城縣知縣鈕琨均經部議降調查漳浦縣濱臨海洋所轄舊鎮一澳與彰化縣之七鯤山相對民俗刁悍稽查不易浦城縣為上游入境首站有稽察文報之事該二縣均不便驟易生手又莆田縣亦係濱海要區為自省至泉孔道現有兵差往來候補知縣郭廷魁歷署繁缺俱能辦理裕如臣現在委令前往署理但亦已緣事降調懇准將羅澤坤鈕琨暫留漳浦浦城之任郭廷魁暫署莆田縣事

候勦匪事竣再行交卸又閩安協副將徐鼎士亦緣事降調臣現今其帶印領兵由閩安出口前赴淡水八里坌勦捕賊匪均奏入

上命軍機大臣傳諭李侍堯常青徐嗣曾曰現在該省兵差往來正需熟手所有降調人員自應留本任以資駕輕就熟但該省似此等降調人員自必尚有李侍堯到閩後應於勦捕事竣會同徐嗣曾核其功過分別辦理此時祇須彙總咨部存案亦可毋庸逐員

特奏也又徐嗣曾奏拏獲匪犯陳樵訊係賊匪遣回
探聽官兵消息恐所遣不止一人亦不止一處現經
督臣提犯審訊等語此應留心者該督等務須嚴飭
各屬慎密查拏加意防範毋任竄逸偷渡

同日孫士毅奏言現在接准閩浙督臣常青咨稱
天地會根源起於粵東有和尚洪二房及朱姓人
住居後溪鳳花亭不知何府何縣地方該犯楊咏
等現已解京令臣密查辦理等因查天地會名目

起於逆犯林爽文而根源由於該二犯平日必係素為衆匪信奉親近之人實係何府何縣人氏夥犯斷無不知之理臣一面飭屬密速查拏一面札覆常青如再獲有他犯將洪朱二犯籍貫究訊明確立即移知到臣查拏更易就臣臆見總不離惠潮二府民人緣潮郡民人赴臺貿易者多惠郡次之煽惑入夥事所應有臣於上年鵬底即嚴飭惠潮二府州縣密查平日曾經赴臺貿易之人此時曾

否回家有無別項詭秘縱跡現據地方官拏獲數人
未經究有端倪今思洪姓朱姓此時或現在臺灣
抗拒官兵或已潛回粵東惟有即於此項貿易人
內切實追求自不難由影響而得實際臣已就近
嚴諭潮屬州縣上緊設法偵拏此案逆犯將來竄逸
必多必須大員專司督辦已飛札臬司姚榮星速
赴潮不動聲色專辦緝拏匪犯一事省城現無緊
要案件藩司許祖京可以料理撫臣圖薩布二月

中旬即可回任為期亦屬不遠又派赴廈門聽候調遣之南澳右營及澄海門營之兵丁五百名分作兩起先行其碣石鎮標之五百名現亦到齊接續前進計正月初十至十六日所有水師一千名俱全數入閩省境

同日左翼鎮總兵李化龍奏言抵閩粵交界之黃岡地方經督臣孫士毅會同署提臣彭承堯將派撥水師戰兵一千名配足軍火器械裹帶一月口

糧分作四起自初十日起間日行走計十六日俱
可入閩省詔安縣境臣察看弁兵俱各精壯踴躍
臣即定於十六日自黃岡起程統領前往聽候閩
浙督臣調遣均奏入報

聞

二十八日丁酉常青奏言聞提臣黃仕簡總兵郝壯
猷副將丁朝雄等所帶兵船俱於初三日自澎湖
開駕初四日進鹿耳門登岸提臣任承恩統領各

營官兵船隻於初六日齊抵鹿仔港查臺灣郡城
前經差探固守無虞其鹿仔港一路署守備陳邦
光率同目兵義民四處搜捕焚燬賊巢復擒獲賊
夥簡鳩劉實張文林天球林耽朱開六名并聞北淡
水署都司易連新莊巡檢王增鏞統領兵弁招集
義民屢次殺賊惟淡水同知程峻竹塹巡檢張芝
馨均已被害又廈門同知劉嘉會稟稱賊人已知
大兵將到紛紛散去等語伏思賊匪本屬么膺烏

合今兩提臣俱經到臺南北兩路會合搜勦定可
剋期殲滅臣惟嚴飭內地沿海各口岸加緊巡查
以防竄逸并飛提獲解匪犯到泉究審辦理又浙
粵二省前經撫臣徐嗣曾咨請酌撥戰兵原係預
為準備俾資策應旋准兩廣督臣孫士毅以臺地
遠隔重洋風汎靡定先撥官兵一千由陸來厦現
在尚未到齊臣計兩提臣捷音亦不日可到應否
再令前往俟得有確信隨宜斟酌其餘浙粵備撥

兵丁仍容明該督撫各於本境暫駐毋庸遽行赴
閩致滋跋涉至逆首林爽文籍屬漳人臣因慮漳
民或有勾串情事但匪徒糾衆豈必定為何處之
人若漳泉民人果能應募拒賊即係良民臣惟有
核其順逆分別誅賞斷不存岐視之見少露形跡
以致漳民疑懼奏入

上命軍機大臣傳諭李侍堯常青曰昨據徐嗣曾奏稱
黃仕簡到臺後開砲打死賊匪二千餘人賊俱星散

奔逃內山等語內山係生番巢穴向聞遇有內地民人到彼即行殺害但現在賊匪被官兵追剿窮蹙逃竄明知一經官兵擒獲萬無生理或將所掠財物賄結生番容留藏匿或恃其人衆脅制生番而生番畏其兇惡任聽竄處並恐將來撤兵後賊匪等轉勾結生番潛出滋擾更為可慮尤不可不預行籌辦淨其萌孽現在水陸兩提督帶領多兵在臺會剿自應乘此兵力搜剿殲除勿令賊匪得以逃匿負隅但黃仕

簡與任承恩均係提督一同帶兵在彼辦理體制不相上下且水陸各有所轄難以統攝常青於辦理善後事宜自不如李侍堯之諳練而督率搜捕則常青為優著李侍堯抵閩後即駐劄蚶江常青即親自渡臺督同黃仕簡統領官弁將竄入內山賊匪餘黨盡數搜捕務淨根株仍不得因追捕賊匪或致擾動生番方為妥善其任承恩於常青抵臺後即令先回本任以資彈壓如此庶事權歸一有所責成現在湖廣

有舒常署理督篆常青無須急赴新任惟當督同黃
仕簡悉心妥辦鎮戢海疆以為一勞永逸之計再臺
灣地方前聞楊景素在道員任內設立土牛分別內
外地界其是否辦理妥協並著常青會同黃仕簡於
勦捕事竣後親往履勘斟酌妥善歸於善後事宜內
一併妥辦

二十九日

戊戌

常青奏言官兵登舟之後雖因風阻

不能迅速直達但節次探明臺灣郡城固守無虞

其鹿仔港及臺北之艋舺等境均有官兵及義民人等互相保護較之從前奸民朱一貴滋事全臺失陷一案情形已屬不同且兩提臣俱經率師前往更易辦理臣已傳知該提臣等務須併力合攻以期一舉殲事一俟得有收復各縣及殲匪情形即將拏獲首夥各犯在該處迅速正法并將一切善後事宜留交黃仕簡辦理奏入

上命軍機大臣傳諭李侍堯常青曰本日常青由六百

里加緊奏到一摺以為勦滅臺灣逆賊之信及至折
看祇係覆奏事件又何必由驛馳遞徒勞驛馬乎常
青何不知事體輕重若此前曾有旨令藍元枚赴閩
署理陸路提督並諭常青探聽臺地消息一俟歲功
即可傳知藍元枚行抵何處速回江南本任今思任
承恩在臺統兵會勦於該處情形皆所目擊而松江
提督已有人署理現無緊要應辦之事著常青俟抵
臺後即令任承恩迅速馳驛來京候朕面加詢問一

切其福建陸路提督著藍元枚仍行署理毋須即回
江南本任至林爽文王芬二犯係此案首惡渠魁如
經官兵生獲著該督等派委幹員弁解京審辦並
飭該委員等沿途小心加意防範毋得稍有疎虞致
干咎戾

二月初一日

己亥徐嗣曾奏言聞淡水守備董得魁

招集泉民勦捕賊匪十二月十八日有原署淡水
同知程峻之幕友壽同春用計退賊會同俸滿巡

檢李生椿及塹城書院掌教之原任榆林縣知縣
孫讓率勵義勇收復竹塹追獲賊匪王作等三十
餘人正法該守備馳往塹城協同守禦又署淡水
都司易連新莊巡檢王增鏞於十二月二十三及
二十六七八等日分路勦殺大姑坑等處賊匪官
兵義民各皆奮勇殺賊百餘人數十人不等先後
擒獲陳軒等十名正法奪獲旗桿器械義民間有
受傷賊匪雖屢經勦殺旋散旋聚現聞提臣黃仕

簡總兵郝壯猷皆於初四日由鹿仔港登岸賊匪
知大兵已到紛紛散去黃仕簡定於十三日前往
收復諸羅陸路提臣任承恩初六日抵鹿仔港登
岸亦定於十三日分兵進剿查鹿仔港鹿耳門相
距頗遙兩提臣先後進口皆剋期於十三日剿賊
正與

聖訓相符而鹿仔港署守備陳邦光於提臣任承恩未
到之先又擒獲賊匪簡鳩等六名鹿仔港與北淡

水相去較近徐鼎士等兵抵北淡水又復適當其
時三路圍攻自必一舉蕨事此時沿海一帶尤宜
嚴密截拏防其竄逸但賊匪內竄必不敢由正口
逕入自漳泉興化至福州福寧濱海各縣汊港紛
歧在在皆可偷渡臣先已嚴飭文武員弁選撥兵
役於凡可偷渡之處羅織巡查現復通飭以賊匪
洗蕩在即加意堵防毋使一名漏網至郡城既保
守無虞而彰化淡水等處又有鄉勇義民協同勦

禦大兵一到賊即紛紛逃潰不但無須隣省策應
即本省官兵亦不值多為調派臣知識短淺身親
其事不能辨晰實深感愧奏入

上命軍機大臣傳諭李侍堯常青徐嗣曾曰此等么麼
賊匪原不過一時烏合現在黃仕簡任承恩督兵會
合搜剿自無難立時撲滅前因徐嗣曾輕離省城恐
致人心疑駭曾降旨飭諭此時人情大定非同前此
且大兵抵臺三路圍攻賊匪自必四散潰竄恐有逃

至原籍及內地者尤應於各口岸嚴密截拏徐嗣曾不妨視其地方緊要間一親往各處搜查前有旨令李侍堯抵閩後即駐劄蚶江督辦一切常青親自渡臺督同黃仕簡等搜勦賊匪著傳諭該督等遵照妥協辦理常青抵臺後即令任承恩迅速馳驛來京該提督輕於舉動未免跡涉張皇然究屬遇事勇往尚無不是今令其來京不過欲面詢臺地事宜常青可告知該提督毋庸心生疑懼

臣等謹按兵貴先聲制人兩提臣於到臺之始賊匪即已望風驚潰小醜技倆於茲可見若能兩路定期會勦直如摧枯拉朽乃觀望遷延遂使烏合之衆得乘暇廣為糾集愈肆鴟張實屬有負任使賴我

皇上神幾遠燭罰不旋踵是以

天威震疊即得迅掃賊氛也

初二日庚子徐嗣曾奏言遣將調兵本應督臣主政

乃臣於派兵赴淡水一節因巡檢王增鐔稟請救
援迫切急求集事竟一面奏派一面咨會督臣未
及札商辦理事後捫心自訟實屬過涉張皇近於
越俎咎無可辭至督臣遇有公事悉皆開誠剖示
總以協力同心相為期勉即如臣調兵赴淡水未
及待督臣咨覆臣之錯謬已難自解而督臣並不
因此稍存意見惟以公事為重虛衷斟酌將所調
省兵留省彈壓改用延建之兵由陸赴廈悉皆往

返札商議歸畫一至軍需口糧鹽菜及裹帶戰糧
軍火器械船隻人夫等項先經與督臣酌定章程
一切水陸運送均無遺悞本日據廈防同知劉嘉
會稟報官兵到臺賊匪紛紛散去定於十三日會
勦收復諸羅等處郡城內外今已照舊生理民情
安堵等語官兵剋期勦捕自必立就撲滅誠如
聖諭此時總以鎮靜內地嚴拏逸匪為要臣復又嚴飭
沿海文武員弁實力堵拏毋使竄逸

同日松江提督藍元枚奏言正月初八日自松江起身晝夜兼程趲赴已於十九日馳抵福州省城隨訪探臺匪情形自官兵陸續渡臺以後賊衆紛紛潰散現在郡城保守無虞兩提臣剋期會勦自可即日蕆事但恐賊匪四出竄逸逃入內山與生番勾結引藏搜捕不免有需時日若偷渡各處海面山箐捷便之路無不可通尤屬稽捕不易而臺灣語音與廣東之潮州相同此時北風當令海道

赴粵極順恐逆匪等尤易於竄往臣現晤撫臣徐
嗣曾詢知閩省各處口岸已經設法嚴密偵緝臣
抵泉後再當與督臣常青實力查拏一面飛咨兩
廣督撫提臣等并札飭文武員弁加意訪緝不致
一名漏網至臣自入閩境以後察看一路民情俱
各寧謐以鄉語諮詢俱似不知有臺灣用兵之事
省城亦極寧貼均奏入

上命軍機大臣傳諭李侍堯常青藍元枚徐嗣曾曰現

在兩提督厚集兵力剋期會剿自必立時撲滅惟前據徐嗣曾奏黃仕簡到臺後開砲打死賊匪二千餘人賊俱奔逃內山而本日藍元枚亦奏及賊匪竄入內山與生番勾結將來搜捕需時等語內山雖係生番巢穴但賊匪窮蹙無歸或以賄結或以勢脅生番容留藏匿將來大兵撤後潛出滋事尤屬不成事體該督等務須乘此兵力上緊搜捕俾盡根株以靖海疆至賊首林爽文王芬二犯及此外有名頭目如經

官兵生獲即選派員弁解京審辦以彰憲典再前已降旨令任承恩俟常青抵臺後即馳驛來京陛見詢問該處情形其陸路提督藍元枚署理現在江南提督署理有人藍元枚俟任承恩回任後再回江南本任

初四日

壬寅

柴大紀奏言彰屬賊匪林興文王芬攻

陷諸彰二邑恃衆分路來攻郡城自本月初九至十三連日堵禦殺退賊匪十四日子刻接據臺

灣道永福來札知鳳山又被賊陷隨飭遊擊蔡攀
龍帶兵七百名守備邱能成帶兵三百名往南勦
捕以復鳳山乃出城未遠即遇賊衆來犯郡城當
此盜賊蜂起南北交迫郡城為全臺根本倘有疎
失恢復更難查郡城並無牆圍惟以木柵荊竹環
繞實不能固守必離城稍遠於各總口扼其要害
方可有濟臣相形度勢南則桶盤棧地方距城十
餘里可截南路賊衆兼可以應大小東門飭遊擊

蔡攀龍帶兵七百名併南路叅將瑚圖里就此劄營
東則舊萬壽亭離城五里可禦中路之賊亦可以
援大小南門飭守備邱能成帶兵三百名李步雲
帶兵二百名就此劄營其沿海一帶飭守備林球
帶兵二百名把守三鯤身署守備張時泰駕船把
守港口併提標金門等標載班兵哨船六隻俱飭
駛在大港協守則安平既嚴西門亦固至北路賊
匪雖多臣仍劄鹽埕橋獨當一面倘東南門有急

俱可隨時應援署遊擊王天植叅將宋鼎同道府
廳縣等督率兵民堅守四門遊擊鄭嵩在城彈壓
巡查前次城內民人聞風恐懼自鹽城連日戰勝
莫不踴躍鼓舞共奮義勇出城助戰似此四面嚴
守雖南北賊勢猖獗郡城可保無虞俟內地兵到隨
卽長驅前往力圖恢復奏入

上命軍機大臣傳諭李侍堯常青徐嗣曾曰前賊匪滋
擾鳳山時瑚圖里縱馬由南而去不知下落朕以該

叅將之不能抵禦由於兵散獨力難支與臨陣退縮者不同曾諭令常青俟事定後核其功罪分別辦理今該叅將業已回至郡城率兵堵禦如果奮勉殺賊則功過尚足相抵著常青俟事竣後秉公核實具奏並給咨送京候詢問臺地一切情形再柴大紀摺內稱郡城並無牆圍惟以木柵籬竹環繞官兵難以固守等語前曾諭令李侍堯於臺匪蕩平後將是否可以建城之處酌量辦理今閱柴大紀所奏體察情形

彰化等三縣一廳應否改建城垣尚可俟籌辦善後
事宜時確實勘估繪圖妥議請旨辦理至郡城為全
臺根本即應速建城垣以資保障著李侍堯常青一
俟事竣即熟商妥議一面奏聞一面興工辦理

初五日

癸卯

上命軍機大臣傳諭李侍堯曰從前辦理緬匪時曾調
福建水師兵二千名隨同進剿該兵丁等沿途滋事
鞭責夫役甚將民夫雙耳割去當將首犯正法以示

懲儆及隨京兵打仗時又復怯懦竟有聞鎗砲聲恐
懼戰慄欲洩水逃避者可見該省兵丁勇於私鬪怯
於公戰之習牢不可破皆由該省將弁平日不能認
真訓練以致軍無紀律著李侍堯於勦捕臺匪事竣
後實心訓練申明軍律隨時懲創俾各弁兵共凜法
紀有勇知方痛改從前積習以作士氣而勵戎行方
為有備無患該督不可惟知辦理地方事件為重而
轉置軍旅專責於不問也

同日常青奏言現在水陸兩提臣俱經到臺內地
加調官兵亦接續繼進兵力已屬厚集雖未接該
提臣等報有進勦情形已據廈門同知劉嘉會差丁
自臺回廈稱上年十二月二十六至三十等日官
兵與賊打仗殺死賊人甚多收奪器械無數正月
初四日黃仕簡官兵到臺賊匪紛紛散去聞大兵
現定十二三等日長驅會勦郡城內外照舊生理
民情安堵又據蚶江船戶張淡等稟稱陸路提臣

於正月初六日到鹿仔港上岸十一日殺死賊人
七名祭旗等語是該提臣等到臺之後已自相度
情形會齊進剿以期一舉蕝事正與不用零星打
仗輕於嘗試之

諭旨相符再

臣

與撫

臣

徐嗣曾共事日久一切地方公

務無不和衷辦理今臺灣遠隔重洋匪徒竊發恨

不減此朝夕

臣

與徐嗣曾俱有同心祇因

臣

駐劄

泉州距省較遠以致續調官兵稍有參差並非各

存意見況軍務尤關緊要臣不敢因此生嫌至該處商民等保護地方率先向義洵屬可嘉已咨水師提臣黃仕簡於事竣後逐一查辦又提訊盤獲匪犯陳樵據供籍隸漳浦乾隆五十一年六月渡臺在彰化縣大肚地方宰猪營生與林奕文會黨許溪熟識許溪邀入天地會陳樵應允十一月初二日該犯同郭盛吳帶陳榜吳汴李積郭却阮擇薛指林倚趙榮林載生等共十二人齊赴麻園莊王

芬家內入會嗣林奕文攻破大墩營盤殺害官兵
該犯係帶竹篙鎗在場附和林奕文等懼內地發
兵往勦經許溪付給該犯番銀十圓囑令搭船內
渡探聽官兵十二月初二日陳樵赴大安港搭船
於二十八日飄至漳浦古剎僻處上岸聽聞各處
查拏嚴緊不敢回家躲匿附近之陸鰲山內於五
十二年正月初三日經漳浦縣兵役拏獲至天地
會名色不知起自何時等語審明後即將該犯正

法其家屬財產及在臺匪夥分飭嚴拏照理妥辦
至漳浦縣羅澤坤於陳樵上岸潛匿即經會營拏
獲應請免議其臺灣失察偷渡之文武各職名仍
俟查明另叅又彈壓臺灣府城叅將宋鼎遊擊鄭嵩
等因防守小北門把總高大捷逃赴鹿耳門覓船
內渡隨差外委鄭廷棟前往鎖解到郡詰問據供
懼賊勢猖獗欲赴內地隨將高大捷即行正法辦
理尚屬妥協奏入

上命軍機大臣傳諭李侍堯常青徐嗣曾曰現在大兵已到賊匪望風膽落潰逃四散黃仕簡任承恩統領官兵剋期分路進剿捷音何以至今遲滯未到林爽文等於光天化日之下糾衆不法攻佔城池戕害文武官弁實屬罪大惡極神人共憤所有逆惡渠魁及有名頭目務須按名擒拏殲戮如經官兵生獲即選派員弁解京盡法處治不可任其逸入內山搜捕需時該督等更須窮究黨羽按名從嚴辦理務使淨盡

以靖海疆方為妥善

上又諭內閣曰綠營恒怯積習最為可惡在兵丁臨陣
脫逃已屬大干軍紀况高大捷身係把總當臺匪滋
事之時帶兵防守輒敢擅離郡城首先逃避情罪更
重自應立正典刑以肅軍令該叅將宋鼎等一聞高
大捷逃赴鹿耳門之信立即鎖解到郡會同訊明正
法所辦甚是武職中叅遊等官雖非專閫大員於例
不應專戮但行軍之際非尋常無事時可比該叅將

等能知事之輕重一經訊明脫逃屬實即會同該道將高大捷先行正法使在事兵弁咸知敬畏甚屬能事可嘉宋鼎鄭嵩左淵王天植俱交部議叙仍著事竣後俱給咨送部引見向來逃兵拏獲尚且即行正法況高大捷以武弁委城脫逃尤為可惡雖已正法尚不足蔽辜著該督查明伊子奏聞發遣並將辦理緣由著該督撫通行曉諭綠營弁兵使知避賊潛逃希圖倖免不但戮及其身即其子嗣亦難邀寬宥庶

懲一儆百不敢復蹈恇怯惡習

欽定平定臺灣紀畧卷四

欽定四庫全書

欽定平定臺灣紀畧卷五

二月初六日甲辰孫士毅奏言拏獲匪犯許阿協等

四名供上年七月十月在漳州地方被賴阿邊等

糾引入天地會其會起於乾隆三十二年以大指

為天小指為地凡入其教者用三指按住心坎為

號便可免於搶奪被搶銀兩亦可要回等語奏入

上命軍機大臣傳諭李侍堯孫士毅徐嗣曾曰天地會

名色起自三十二年為時已久且該犯等輒敢轉相糾約暗用記號奪取財物毫無忌憚而許阿協等俱在漳州地方被誘入夥並未渡臺可見此等邪教閩省內地已有尚不止臺灣一處從來倡教立會最易煽惑人心為地方之害上年大名糾眾戕官一案段文經亦借立八卦會為名互相勾引遂成逆案而閩省匪徒公然立天地會名色肆行搶奪較之大名邪教其案更久此總由地方官平時不肯實力查察及

遇有犯事者又不能徹底根究以致姑息養奸即如上年臺灣楊光勳一案所立會名即係現經查出之天地會乃地方官改作添弟二字明屬化大為小希圖規避處分此次林爽文等滋事不法即由從前養癰貽患所致不可不嚴切究辦以淨根株著該督等於事定後密訪嚴拏痛予懲創勿再稍留餘孽並將三十二年以後失察邪教之督撫及文武大小員弁澈底查明據實叅奏其辦理楊光勳一案將天地二

字改作添弟字樣之臺灣地方官其咎更重並著確查嚴叅以示懲儆至許阿協供出勾引入教之賴阿邊等犯俱籍隸漳州該督等俟臺匪辦完後即飭屬嚴緝務獲訊明黨羽按名究辦毋任奸徒漏網

初七日

已

常青奏言賊匪於十二月三十及正月

初一日分路攻逼郡城經鎮道督率文武員弁兵民義勇人等協力剿殺鎗砲打死賊人甚多賊匪四散奔逃又臺灣府知府印務先經飭令福州

府同知楊紹裘署理奏入

上命軍機大臣傳諭李侍堯常青黃仕簡任承恩曰此
次與賊打仗文武官弁及兵民義勇人等協力勦殺
奮勇得勝保護郡城實屬可嘉俟常青抵臺灣於勦
捕完竣後查明實在出力人員分別奏請交部議叙
所有義民鄉勇激發公義協力勦賊尤堪嘉獎僅令
地方官分別獎賞尚不足以示鼓勵著常青於抵臺
灣後查明各義民鄉勇內如係務農經商生理者即

酌免交納賦稅若係首先倡義紳衿本有項帶者即
開列名單奏明酌予職銜以示優異至黃仕簡任承
恩於正月初四初六前後抵臺迄今已一月有餘何
以尚未據奏報勦賊消息該提督等係專閫大員抵
臺灣已久即待厚集兵力剋期進攻亦應將賊匪情
隨時奏報乃至今總無消息所辦何事黃仕簡任承
恩著傳旨嚴行申飭看來黃仕簡任承恩全不諳事
理輕重緩急且彼此俱係提督不相統攝竟有互相

觀望之意於勦捕事宜不能得力近來常青屢次奏報甚有主見籌辦一切頗合機宜此時李侍堯自己抵泉州常青交印後即速渡臺灣督同黃仕簡等勦捕賊匪務將賊首林英王芬及此外有名頭目擒拏解京盡法懲治不可任其逸入內山原任山東按察使楊廷樺曾任臺灣道且在閩省年久於該處情形自所熟悉其獲咎因監犯越獄究非私罪可比前已有旨交與李侍堯帶往差遣委用現值用人之際即

著楊廷樺補授臺灣府知府仍帶革職留任並傳諭
常青俟李侍堯到閩即令楊廷樺渡臺接印任事
臣等謹按林爽文結黨肆虐一時義民鄉勇或首
先倡義或應募急公其義憤激發足見小民具有
天良哉

皇上深為嘉予以僅由地方官獎賞不足以示鼓勵特
諭令督臣查明農商酌免稅賦紳衿給予職銜

隆恩逾格彰優異而務普霑宜乎志切同仇倍加感奮

也

上又命軍機大臣傳諭李侍堯常青曰該匪等私行倡
立天地會已閱二十年之久在其黨者自必隨同搶
奪而被搶者豈有甘心隱忍不行呈控之理乃從未
見該督有查辦會匪搶奪之案若被搶之人呈控到
案該地方官又何所迴護竟置不辦其故殊不可解
且事歷多年其黨羽必多著李侍堯常青均俟剿捕
完竣後李侍堯在閩省內地各屬密訪嚴拏常青在

臺灣地方即速嚴行搜緝毋得稍留餘孽仍應不動聲色妥協辦理並將此會究係起自何年該省有無被搶控告地方官沉擱不辦之案確查叅劾

同日常青奏言水陸兩提臣到臺日久迄今未得殲賊確信必因南北兩路往復熟商以籌併力合攻動出萬全不無少需時日但臣盼望逾切夙夜靡寧至臺灣郡城及鹿仔港新莊一帶俱能攻殺賊匪保護各境今當大兵四集定可剋期掃滅淨

盡又逆匪林爽文等糾衆蔓延佔踞彰化諸羅鳳
山等縣守土文武各官或臨敵捐軀或奮身殉節
除臺灣知府印務先經飭委福州府海防同知楊
紹裘前赴署理今經大兵進剿被陷地方以次收
復所有知縣同知各缺均應遴員速往經理臣隨
飭令原任同安縣知縣黃嘉訓前往署理諸羅縣
知縣事務候補知縣宋學灝前往署理彰化縣知
縣事務其鳳山縣缺即以現准調補之張升吉速

赴任事又理番同知一缺委令原任俸滿理番同知王雋署理淡水同知一缺飭令現准陞署之徐夢麟前往任事至各廳縣印信除淡水同知關防已據繳送到臬即發交徐夢麟攜帶備用其餘尚應查追下落先飭將各經歷縣丞印信關防借給備用俾得各昭信守所遺彰化等屬縣丞巡檢典史各缺亦俱隨時派委前往至被害武職各官咨令水師提臣黃仕簡即於現在領兵到臺之副將

叅將都守內就近酌量委用統於事竣之日循例
分別題咨辦理再查臺灣府知府孫景燧係在彰
化拏賊被害所有印信亦恐遺失已飭署府楊紹
裘借用臺灣府經歷印信其內地府經縣丞借用
印信關防俱令布政使暫給木戳以資應用奏入
報

聞

初八日

丙午

藍元枚奏言二十一日馳抵泉州查鹿

仔港及北路之艚舨等處皆有官兵率同義民各
相保護提臣黃仕簡等俱於初四初六等日進港
會合勦捕臣受茲重任所有地方情形一切事宜
凡思慮所及惟有勉竭心力統向督臣常青相商
籌辦奏入報

聞

初九日丁未徐嗣曾奏言連日接據臺灣鎮道具報
鳳山滋事不法之賊首王啟郎曾錦等亦被拏獲

該鎮柴大紀等又偵知賊匪於三十日分路來攻預為準備官兵用鎗砲打死百餘名該道永福等分路捕剿殺賊無數蔡攀龍見賊匪由南蜂擁而至復率兵民奮勇截殺鎗砲打死賊匪甚多鄭嵩奮力夾攻追趕十餘里賊俱散退等語是賊匪屢經剿殺業已膽落今聞提臣黃仕簡兵到即已紛紛散去加以陸路提臣隨後踵至并力夾攻臣竊計現在官兵會剿窮搜賊匪必無稽誅之理特恐

其潰逃竄逸復又嚴飭沿海地方加意巡防堵緝其賊匪船隻經臣與督臣先後檄飭嚴加搜燬並飭臺地文武於商船出口時盤詰稽查毋致夾帶偷渡既杜其逋逃之路復絕其偷越之根自可不致一名漏網至於內地漳民疊次廣為曉諭漳屬民人現有紳士耆民教率子弟族黨於各海口地方密拏匪犯者當即分別獎勵以示風勸臺灣屢有奸民械鬪之案此次林爽文等竟敢攻犯城池

皆由地方官辦理各案止期就案完結並未徹底
嚴辦以致刁民肆無忌憚臣查逆匪林爽文所住
之大里杙莊從前謝笑械闖案內即有該莊林姓
多人而諸羅縣楊光勲案內逸犯張烈等現因逃
入林爽文莊內地文武往拏遇害可見奸民結
會樹黨氣類相通仰惟

聖明洞鑒實於數千里海外情形瞭如指掌自當凜遵
痛加誅勦以淨根株又查辦要犯家屬惟有處以

鎮靜出以鎮密不使稍露端倪令該處民人坦然無疑犯屬自不致免脫漏網奏入

上命軍機大臣傳諭李侍堯常青徐嗣曾曰王啟郎曾錦係鳳山滋事賊首與高文麟等四犯無異既經拏獲著該督撫等押解來京聽候審辦其遊擊蔡攀龍督率兵民奮勇殺賊尚屬可嘉並著事竣後給咨送部引見此時各路官兵早已齊抵臺灣賊人望風膽落勢必紛紛逃竄各口岸巡防堵緝尤為最要李侍

堯於二月初二日經過杭州計日內已可抵泉州常
青交印後迅即前往臺灣遵節次所降諭旨妥協督
辦總期迅速蒞事

十一日

巳

常青奏言接准黃仕簡咨稱帶領官兵

於正月初四日到臺經將查辦情形於初五日具
奏等因查該提臣所稱初五日具奏一摺並未到
泉似係被風阻滯而任承恩由鹿仔港登岸之後
迄今尚無進兵確信探聞現駐劄彰化此時南北

兩路自必聲息相通軍威益壯至查閩省先後派
調官兵共計一萬內兩提臣管帶四千四百名總
兵郝壯猷管帶一千五百名普吉保續帶六百名
副將林天洛管帶一千名俱已陸續到臺又遊擊
延山帶領福寧等兵一千名亦經配渡前進惟副
將徐鼎士管帶督撫標兵一千五百名由閩安出
口屢被風阻擬舳江通判探報十五日到東湧放
洋又復因風飄散現止千總陳玉光兵船一隻於

十八日自滬尾港登岸其餘各船尚未抵淡但核計到臺官兵已共八千數百名兵力不為不厚所有廣東兵一千名即可令其轉回其浙省派備兵三千名亦應撤令歸伍以省糜費惟漳州一帶地方緊要應將粵省撥赴潮州兵二千名暫行留駐俟臺地勦匪事竣再令歸營臣等與署陸路提臣藍元枚商酌意見相同現已分咨廣東浙江督撫各臣查照辦理又接據臺灣鎮於十二月十八二

十一二十七等日來稟內稱十二月十四日遊擊
楊起麟搜捕各莊獲賊康里等五名十五日遊擊
林光玉搜捕竹籠等莊獲賊楊元等八名十六日
守備楊鵬把總李春魁等搜捕大洲等莊賊匪數
千圍攻該鎮督率弁兵飛往攻擊鎗砲打死賊匪
百餘人生擒康合等五人十八日守備楊鵬等搜
捕溪塘各莊獲賊王齊等五名又獲奸細陳老二
林保保二名訊供係賊軍師陳天先差令探聽黃

仕簡已未到臺及鹽埕營盤有兵若干并以諸彰
二縣俱乘大雨攻破亦俟天雨再來刼營政府等
語又接到同知楊廷理札會彰化義民張明義等
解到賊匪楊牛林活潑等供稱首犯林爽文在鹽
埕被砲打傷逃去醫治伊叔林清招匪復圖攻擊
隨將陳老二林保保正法十九日午後雷雨賊衆
果三面擁至官兵力戰一夜至二十日辰刻臺灣
縣義民亦來助戰兵丁余海首先趕入賊陣放鎗

打死一賊各弁兵繼進殺賊百餘名生獲匪陳廷等八名一併解交臺道究辦二十六日賊人又攻鹽埕橋自辰至申鎗砲打死賊匪數百并打死騎馬賊一名賊衆始退隊內兵丁陳成金徐富二名畏蕙退後即行梟首示衆餘兵奮勇追趕殺死賊人數十名生獲賊匪林大興等三名就軍前正法等情又將拏獲之匪犯簡鳩陸文朱開劉實即黃實林天球林耽鍾祥等七名提訊鍾祥與逆首林

與文素相熟識張文朱開劉實林天球并林耽之
子林萬均係林與文王芬糾邀入會簡鳩原係畫
匠並非會內之人因與已獲賊目楊振國素識令
其畫旗隨同入夥賊匪等當逆首林與文糾衆剗
營攻城之時鍾祥一犯持刀入城遇理番同知長
庚撲捕遂加戕害張文殺死兵丁一人復在城縱
放監犯朱開傷害官兵一人劉實林天球二犯據
供並未傷人惟持木棍隨同附和林耽先充彰化

縣役年老黜退其子林萬原屬會匪該犯於攻城時主使其子在內接應迫林興文分攻諸羅淡水派令各該犯在彰化踞守經署備陳邦光率同義民往收彰城將該犯等先後擒獲其天地會名目起自何時及入會人數多少反覆究詰不能指實即將該犯分別凌遲斬決懸首梟示各犯家屬財產分飭各縣照例查辦林朮之子林萬雖據供稱已被義民殺死是否屬實仍飭確查又陳邦光等

獲賊目楊振國等四犯應坐家屬俱在彰化已容
會提臣嚴行搜捕嗣後如有續獲要犯其家屬住
居原籍者統候勦匪事竣會同提臣查拏究辦

同日黃仕簡奏言郡城為全臺根本週垣廣濶僅
係木柵環植本非峻險城隍臣抵臺後加緊守禦
保固府城初六初九初十十二等日計擒獲賊匪
王鍛等二十三名及賊目陳拱福賊夥陳捷等并
奪獲刀械等項審明正法梟示十二日金門南澳

銅山等標營官兵續到臣隨遣海壇鎮總兵郝壯猷率同副將丁朝雄叅將那穆素里遊擊蔡攀龍都司羅光照等帶領兵丁二千三百五十餘名前往南路剿匪恢復鳳山又遣臺灣鎮總兵柴大紀率同叅將潘韜遊擊李隆楊起麟林光玉守備邱能成等帶領兵丁二千二百三十餘名前往北路進剿恢復諸羅彰化等處臣帶本標官兵會同臺灣道永福在南北路衝要處所堵禦擒捕往來策

應以壯聲援仍分遣弁兵往沿海口岸把守堵截
飭令在城文武官弁嚴守郡城務期迅殲逆賊恢
復各縣城池至府城民居稠密去冬被賊迫擾未
免驚惶臣到臺灣後復出示曉諭安民現在市肆
開張商賈貿易如常民情安堵又上年十二月內
逆賊林爽文等疊攻府城經臺灣道廳縣各催募
鄉勇數千守城臺府居民鋪戶亦募義民數千帮
助兵丁敵賊臣到臺之後各加獎賞申明大義人

人感戴

皇上恩威愈形踴躍均奏入

上命軍機大臣傳諭李侍堯常青曰黃仕簡雖係病後但身為專閫大員既抵臺灣理應親身帶兵勦賊何得僅以派員前往了事且彰化縣城久經守備陳邦光收復而該提督摺內何以尚稱令柴大紀前往收復彰化等處任承恩由鹿仔港登岸係在北路即當知會黃仕簡分路夾攻辦理方中竅要乃迄今月餘

尚無進兵確信看來伊二人竟各不相下心存觀望
此即朕於事起時不欲令任承恩去之意今竟不出
所料常青不可不迅渡臺灣督率辦理並著常青於
到臺後即行秉公嚴查如該提督等實有觀望不前
之處即當據實嚴叅不可因業已調任意存迴護兩
可完事再任承恩似此遲延不奏則該提督及副將
徐士鼎前後奏守風待渡之說亦恐不足信並著常
青一併據實查奏如該督稍有瞻徇將來經朕查出

即首領亦不能保不可不慎也至該督雖已調任湖廣但此事究係伊在閩浙任內之事尤宜督同妥速辦竣方可將功補過即李侍堯以現在閩浙總督駐劄泉州凡臺灣勦捕等事亦應聽常青就近調度協同幫辦和衷共濟其各弁兵內如有因常青係別省總督呼應不靈致誤機宜者該督不妨竟按軍法從事使士卒咸知儆惕現在帶兵大員有總兵柴大紀郝壯猷普吉保三人足以分路勦捕著常青於抵臺

後留心察看若黃仕簡實係病體未愈即留於彼處亦屬無益可令其回至廈門本任調養又常青審明賊夥正法摺內稱劉實林天球二犯據供並未傷人惟搗木棍隨同附合等語此等叛賊豈可復以尋常附和而論況該二犯業於審明後正法摺內又何必為聲說致蹈辦常案故套着該督嗣後於拏獲逆匪時其首要各犯仍遵前旨派員解京其餘各犯審明後即一面正法一面具奏以淨根株

上又命軍機大臣傳諭黃仕簡任承恩曰前據常青奏
鹿仔港署守備陳邦光帶領弁兵率同泉州粵省義
民攻復彰化縣城擒獲賊目高文麟等四犯又據徐
嗣曾奏鳳山滋事不法之賊首王啟郎曾錦等已被
拏獲賊人於十二月三十日來犯郡城鎮道親督義
民與遊擊等分路剿殺賊匪無數各等語是彰化縣
城久經陳邦光等收復其鳳山等處亦經柴大紀等
派兵分路剿捕郡城已無事矣何以黃仕簡摺內僅

稱派委總兵等分赴南北二路進剿恢復縣城竟似
該處軍情全未知悉者看來黃仕簡竟思安坐郡城
並不親赴各該處督率剿捕大屬非是提督為專閫
大員領兵是其專責黃仕簡深受朕恩現帶兵剿賊
雖係病後理宜奮勉出力乃於剿捕事宜奏報遲延
全不得行軍要領該提督所司何事試思臺灣郡城
經賊人屢次攻犯該鎮道等當大兵未剿之先尚能
保護無虞焉有此刻又添提督所帶大兵轉須協同

守禦之理宜黃仕簡竟欲以守護郡城為名遷延坐視耶黃仕簡著傳旨嚴行申飭至任承恩由鹿仔港登岸即應將該處賊匪情形及辦理勦捕事宜先行具奏乃日久並未據有奏報現據常青摺內稱該提督尚無進兵確信探聞現在駐劄彰化等語任承恩係自請前赴臺灣勦賊既由鹿仔港一路進兵即應督同陳邦光等上緊追捕殺賊並知會黃仕簡分路會合夾攻何以駐守彰化漫無籌畫其心何居任承

恩亦著傳諭嚴行申飭

欽定平定臺灣紀畧卷五

欽定四庫全書

欽定平定臺灣紀畧卷六

二月十三日

辛亥

任承恩奏言統領官兵於十二月

十七日開行因風雨阻滯直至正月初四日放洋
於初六日全抵鹿仔港登岸後正分派小船撥度
兵械忽起風暴小船不能擺渡延至初十日始能
全行上岸安營連日審察地方形勢偵探賊匪情
形林爽文等仍分屯諸羅縣城及鉄線橋地方阻

截南北道路署鹿仔港守備陳邦光糾約鹿仔港
義民林湊等乘虛擒捉賊目收復鹿仔港彰化而
賊目陳泮吳領等仍復擁衆踞住彰屬東南山之
虎仔坑萬丹城一帶地方勾結內山生番日擾四
處村庄又彰屬大里杙等處係林爽文等住居起
事之地其中匪夥時出滋擾臣伏思鹿仔港為臺
北咽喉要口居民稠密現今各處避難人民羣集
雜處奸匪亦遂混跡其間人心時覺驚惶又逼近

虎仔坑大里杙賊巢必須先行掃蕩俾要口得以

寧輯

臣

即於十一日分派遊擊穆騰額守備潘國

材帶兵五百名由員林進剿中路由南投各庄遊擊

海亮帶兵三百名并鄉勇熟番人等進剿南路嵌

頂各庄守備常萬雄帶兵三百名并鄉勇等進剿

北路北投各庄以次會剿虎仔坑等處并派都司

馬元勲帶兵三百名駐劄大加冬防範濁水溪後

路茲遊擊穆騰額於十二日至許厝寮上浦仔下

滿仔等庄賊匪聞風逃遁當將賊庄三處盡行焚燬十三日帶兵登山行至半嶺遇賊即行佔住左山梁用鎗橫擊打死賊人甚多隨即飭令署守備沈勇雲帶兵分往林厝仔施厝坪搜燬賊庄賊衆蜂擁迎拒官兵用鎗砲進攻賊人四散逃竄計燒燬賊庄六處殺賊首級八顆奪獲藤牌鎗炮等械又遊擊海亮十三日進攻嵌頂賊匪數百人踞住山梁用石打下即令藤牌前攔鎗炮伏後扒山仰

攻打死賊匪十餘名賊始退走官兵追趕上山將
及三條崙地方賊匪又復拒敵隨用鎗炮打斃賊
人甚衆餘賊奔竄經官兵民奮勇追殺割獻首級
耳辮奪獲鎗刀等械共燒燬內灣竹脚寮宮下仔
粗坑頭三條崙松柏坑竹仔坑七處賊庄又守備
常萬雄十三日進攻北投庄鎗炮打死十餘人賊
匪敗退進至月眉庄賊匪又來抵拒當即督兵鎗
斃四人殺死二人奪獲鎗箭等械焚燬上茄老下

茹老月眉庄北投林仔頭溪舟等處賊庄各等情
又連日據各庄義民兵役社番人等擒獻賊偽號
將軍林里生並賊夥高玉等十三名并呈繳賊渠
王芬首級一顆訊據林里生供稱林爽文封做掃
北大將軍曾經攻破竹塹城又夥賊高玉等隨同
林爽文或攻彰化縣或攻諸羅縣俱各供認不諱
因林里生一犯現患病沉重當即凌遲處死其餘各
犯概行處斬又王芬首級訊之賊黨林里生等合

認屬實舖戶居民無不稱快

臣

將該犯首級并林

里生首級一同梟示其呈繳擒獻之各庄貢生張

明義生員張植槐民人錢凌碧邱景厥蔡運世施

烜光大肚社熟番通事烏肉曲岸里社熟番通事

潘明慈番貢生潘士興兵丁方得章陳論林世忠

等均行分別獎賞又據運糧官黃嘉訓訪有彰化

縣兵房書辦劉志賢曾受林爽文偽封鹿仔港同

知公然到任鞭朴平民擅收鹽課需索船規即親

率跟役拏獲訊供不諱即日解送督

臣

審辦更訪

得在港居民有乘機搶奪之徒未便姑容致滋騷

擾當飭叅將福蘭泰拏獲楊禮等十一犯挑斷腳筋

以示懲創

臣

仍嚴督將脩將虎仔港一帶賊庄剋

日剿平陳泮吳領二人務期拏獲再將官兵調赴

大里杙一帶搜剿林爽文賊巢淨盡後

臣

即當親

統官兵南下會同水師提

臣

黃仕簡商酌機宜同

心并力迅擒首逆盡殲匪黨又到港後據被害臺

灣府知府孫景燧家人丁壽呈繳臺灣府印信一顆又被害彰化縣知縣俞峻家人毛榮呈繳彰化縣印信一顆又鹿仔港被害巡檢馮啟宗之子馮廷玉呈繳鹿仔港巡檢印信一顆并僉稱各故員於未被害之前予將印信交付收藏并言我死是該當印係官物未敢遺失你速帶去逃避等大兵到日呈繳各等語隨將印信三顆驗明封固統俟克復諸羅之後委員賁交臺灣道永福收貯仍即

飛咨督撫二

臣查辦

同日黃仕簡奏言臺灣五方雜處逆匪膽敢恣行不法罪大惡極其間或被迫脅隨行者自必不少是欲殲其渠魁必亟散其黨羽臣先經飛檄示知臺地民人現在帶領官兵進剿凡被賊匪迫脅隨行者速須解散無致悉被刑誅嚴切曉示在案先聞賊匪於正月初四五等日要來再攻郡城迨臣統領官兵到臺初四五等日逆賊不敢復來迫攻

緣郡城最關緊要

臣

隨將到臺官兵先即一面分

派四路堵截一面相機發兵進剿日內陸路提

臣

任承恩亦即續帶官兵及金門南澳銅山等標營
兵丁到臺自可調度分發南北夾攻均奏入

上命軍機大臣傳諭常青曰本日據任承恩奏到派撥
官兵於鹿仔港一帶焚燬賊庄擒殺匪夥一摺所辦
雖畧有頭緒但殺賊甚少前經降旨諭令任承恩俟
常青到臺灣後即馳驛來京陛見但此時任承恩正

在帶兵剿捕著常青於到日察看情形如果任承恩奮勉得力即令其在彼率領將弁追捕賊匪以期迅速藏事若伊在彼不甚得力即據實具奏仍遵照前旨飭令赴京陛見候朕面訊一切現在該處領兵大員尚有總兵柴大紀郝壯猷普吉保三人足資帶兵剿捕也

上又命軍機大臣傳諭李侍堯常青曰任承恩派兵分路進剿共有千四百名又有鄉勇等幫同剿捕而所

殺賊人首級割取耳記為數甚少前此署守備陳邦
光以微末員弁尚能督率兵民多殺賊衆並擒要犯
高文麟等四名出力可嘉任承恩等轉不及該弁寧
不知愧乎現在賊衆既分屯諸羅縣城及鉄線橋地
方黃仕簡任承恩二人務宜親督弁兵南北夾攻以
期一舉齊事勿再遲延至摺內所稱各庄生監義民
人等擒獻賊目并呈繳逆渠王芬首級一顆此等擒
獻賊目并呈繳逆渠如官兵未到之先本未從賊及

見官兵到彼即擒賊來獻自應優加獎賞若先被賊逼脅觀望附從後見官兵勢盛懼而擒獻只可免其治罪不得令其倖功著常青於到臺灣後查明分別核辦至林爽文王芬係此案首犯今王芬雖已殲斃若林爽文復臨陣被戮或情急自戕轉使首逆倖逃憲典無以示懲著常青於到臺灣時務須設法將林爽文生擒解京方為妥善其呈出之王芬首級並著覆驗明確查明係何人所殺若此時不能詳加辨認

設將來又有王芬其人尚復成何事體該督不可不慎也劉志賢身充書吏竟敢受賄偽職公然到任實屬罪大惡極凡應行緣坐者一概不可寬宥該督於訊供後一併派員妥速解京至拏獲乘機搶奪之楊禮等十一犯雖已挑斷腳筋但該犯等輒敢乘機搶奪騷擾良善即與賊匪無異僅以挑斷腳筋完結不足示儆並著常青查明搶奪屬實即將該犯正法示衆再據黃仕簡奏欲殲其渠魁必先散其黨羽等語

所奏非是此等辦法或因起事之初兵少賊多為一時權宜之計則可今軍威壯盛自應趁此兵力蕩洗賊巢勿使轉留餘孽若黨羽既散將來如何按名究辦況大兵一撤賊夥散而復聚豈不更煩兵力此皆伊等平日將就完案之見此次林爽文等糾聚滋事即由從前姑息養癰所致今該犯等肆逆至此豈可不殲戮淨盡以絕根株且現據任承恩奏賊人勾結內山生番日出滋擾可見賊人自知罪在必死負隅

煽聚非痛加剿洗勢必仍行肆擾現在兵力既盛亦
不難將所結之生番等一併勦辦上年戕害同知潘
凱一案即係生番滋事倘能趁此剪除將來內山等
處俱成熟番不更一勞永逸乎著傳諭常青即遵照
節次所降諭旨相機妥辦總以剿賊務盡勿留後患
為要

同日海壇鎮總兵郝壯猷奏言承准督臣常青照
會令挑派精壯兵丁四百名配足軍裝器械齊集

閩安前赴進剿隨即派兵起程於十二月十五日
到閩安適副將丁朝雄叅將那穆素里管帶督標
海壇閩安烽火兵丁共一千五百名陸續亦到

臣

即令分派船隻於十二月十九日由閩安開駕到
平海放洋緣連日風暴至五十二年正月初三夜
抵鹿耳門水師提臣黃仕簡船隻亦到初四日一

同登岸進城即將到臺官兵分派各要隘處所嚴
加堵截一面會商水師提督臣黃仕簡相機帶兵

進剿奏入

上諭內閣曰據郝壯猷奏奉派帶兵起程到臺灣日期一摺所奏甚不明晰該總兵經總督派令前往進剿逆匪既已率領官兵於初四日登岸自應奮勉出力迅速剿捕並將賊匪現在情形詳悉聲敘方得窺要乃摺內並未敘明祇將起程及行抵臺灣日期敷衍陳奏於剿賊事宜全無頭緒郝壯猷著傳旨嚴行申飭該總兵接奉此旨務須奮勇殺賊毋得稍有疎懈

致干咎戾

上又諭內閣曰臺灣賊匪林爽文糾衆滋事現據任承恩奏臺灣府知府孫景燧彰化縣知縣俞峻鹿仔港巡檢馮啟宗同時被害各將印信令家屬呈繳等語孫景燧等守禦城池猝被戕害殊堪憐憫俱著交部從優議卹

十四日

壬子

上諭內閣曰此次臺灣逆匪林爽文等糾衆謀逆到處

搶掠義民鄉勇人等隨同官兵奮勇殺賊守禦郡城
甚屬可嘉業經降旨令該督等查明優賞惟念逆匪
滋事之初經過地方百姓田廬牲畜被蹂躪刦掠及
避賊遷徙流離者殊為可憫亦宜一體加恩普施
惠澤所有臺灣府全屬五十二年應徵地丁錢糧悉
行蠲免以副朕優加軫恤之至意並著該督撫接奉
此旨即日騰黃遍諭各處該部遵諭速行

臣等謹按臺灣一歲三熟比戶盈寧久享昇平之

福茲猝被林爽文肆虐各處村庄受其蹂躪者不
少我

皇上於該處鄉勇義民已捐稅錫銜

恩施廣被復以賊匪所過地方被其刦掠及兵燹流離
者情殊可憫如傷在抱

巽命載申於臺灣府全屬五十二年錢糧悉行蠲免海
外編氓無一不在

皇仁涵煦之中真與天同量矣

同日常青奏言二月初一日申刻准提臣任承恩

咨稱統領各兵船於正月初十日全行上岸及派
撥官兵鄉勇熟番分路進剿據遊擊穆騰額海亮
守備常萬雄等稟報於十二十三日進攻各庄鎗
砲打死賊人甚多各有奪獲軍械並焚燬各處賊
庄俟搜剿賊巢餘匪後即統兵南下與水師提督會
商剿捕等因查該提臣自抵鹿仔港即已分兵剿
捕焚燬賊巢使匪徒無頓身之地現在南北兩路

可互壯聲援併力搜洗且首逆林爽文前據臺灣
鎮稟報訪聞被砲打傷早陰禡其魄而王芬係助
惡大慙又經義民人等割獻首級其餘逆夥定可
不日殲除再_臣前委署理臺灣府廳及各縣員缺

因印信尚無下落飭將府經縣丞等印信關防暫
行給用今據孫景燧家人呈繳臺灣府印信一顆
俞峻家人呈繳彰化縣印信一顆又鹿仔港巡檢
馮啟宗之子呈繳鹿仔港巡檢印信一顆俱經驗

明封固賣交臺灣道收貯隨飭知該道分給各署
員備用特借給內地印信關防繳回仍查追理番
諸羅鳳山各廳縣被失關防印信及武職關防務
獲奏入

上命軍機大臣傳諭李侍堯常青黃任簡任承恩曰本
日常青奏接據陸路提督咨報剿賊情形一摺皆係
任承恩業經奏聞之事何用六百里加緊徒勞驛站
林爽文係此案首犯必須生擒解京盡法懲治方足

以伸國法而快人心據該鎮訪聞林奕文被砲打傷之語畢竟有何確據大里杙等處即係賊人巢穴林奕文又逃往何處若因林奕文有被砲打傷之語將弁等不能將首犯生擒或又捏報因傷身死希圖將就完結致首逆重犯倖逃顯戮設將來又有林奕文復出非獨黃仕簡任承恩罪無可寬即常青亦恐不能當其重戾至王芬一犯據義民等將首級呈繳亦恐不足深信昨有旨著常青等確查覆奏若此時

未經驗明確據將來他處又有王芬其人一經發覺
惟常青等是問

同日孫士毅奏言上年十二月接准閩省咨文挑
備戰兵以資策應_臣才庸識淺不知輕重緩急惑

於漳潮接壤民情疑恐親赴彈壓茲自知錯謬不
禁慚悚交集現在已於正月二十一起先將督
標官兵陸續撤回歸伍其先赴閩省之水師一千
名昨接閩浙督_臣知會現在暫駐漳州用資彈壓

其駐劄黃岡等處水陸兵丁現與署提臣彭承堯

商酌再俟得閩省勦賊確信亦即分起撤回惟粵

省惠潮民人入天地會者諒復不少此種匪會非

別項邪教止圖誑騙錢財者可比必須徹底查辦

淨絕根株臬司姚榮現已行調來潮專司督緝署

提臣彭承堯仍暫駐潮州督率料理臣即於正月

二十六日起程回省奏入

上命軍機大臣傳諭孫士毅曰前因孫士毅接准閩省

咨文立即調發弁兵親赴潮州不過見其遇事急公而不權事理之輕重緩急且恐粵東內地民心懷疑惑是以降旨飭諭現在黃仕簡任承恩齊抵臺灣分路進攻賊匪四散逃竄各庄生監義民擒獻賊目賊夥並割取賊渠王芬首級呈繳大兵會剿餘黨自可即日蕩平此時大局已定孫士毅又當親往稽查彈壓況惠潮民人入天地匪會者不少其從外竄逃入境及內地勾引入會之人均應逐一搜捕不留餘

孽若孫士毅往來督緝豈不較總兵彭承堯及道府等更為有益乃該督率行回省全不知事體緩急因時制宜何以拘泥錯謬若此著傳旨申飭該督接奉此旨即仍前往潮州一帶督率辦理

十六日

甲寅

上命軍機大臣傳諭李侍堯曰前據常青奏黃仕簡等帶兵登舟開駕以後屢被風信阻回朕當即於次日清晨齋心默禱叩

天虔告以祈

神佑嗣據該提督等節次奏報風水順利所帶官兵船隻於二月初三初六等日先後俱抵臺灣赴期進剿可見誠敬感孚聿昭

靈應朕欣慰之餘益生寅凜著李侍堯即親詣

天后宮虔申報謝以答

神庥

欽定平定臺灣紀畧卷六

欽定四庫全書

史部

欽定平定臺灣紀畧卷七至九

內閣中書_臣沈鵬覆勘

武英殿纂修中書_臣彭元琬

欽定四庫全書

欽定平定臺灣紀略卷七

二月十七日

乙巳任承恩奏言等獲奸細僧人西葉心向

新法三名訊供林爽文因攻府城不開聞得鹿港

又有兵到恐大里杙一帶失去隨領夥衆由諸羅

十六門繞回內山於十三日到大里杙就差我等

前來探聽信息并約會陳泮等招集黨夥分抗官

兵不料就彼盤獲當將該犯等正法一面差人探

知林爽文潛回屬實因派遊擊海亮穆騰額署都司張奉廷領兵八百名至馬鳴山一路防禦大里杙賊匪又派都司馬元勲守備常萬雄帶兵七百名留住埔心庄防範虎仔坑一路餘兵七百名留為防守鹿港海口及四路設卡應用隨據哨報賊匪擾及頭卡鎗傷防卡外委兵丁數人當飭該遊擊等速往堵禦據稟二十二日率兵至柴坑仔遇賊施放鎗砲將賊打退追至田中央賊衆齊出抗

敵官兵用鎗砲打倒手執紅黑大旗二賊割獲首級一顆殺賊數十名燒燬賊庄餘賊退走大肚溪東岸因路徑窄狹天色將晚隨將官兵撤回行至薊仔尾有賊匪從竹園裏突出衝散把路鄉勇乘勢擁前千總葉榮吳聯貴奮勇抵禦被賊鎗傷陣亡遊擊等見賊勢逼近鎗砲難施即督藤牌兵丁奮力格殺賊衆潰散奪獲賊人大小銃鳥鎗等項至陣亡帶傷兵丁及損失軍械另容查實具報等

情查賊匪雖連被官兵殺退但首惡未擒潛歸巢穴暗通匪黨恐致蔓延必須合兵撲滅鹿港為內渡要口各處難民紛紛屯聚尤須多兵防守已咨報督臣移咨水師提臣會籌辦理

同日黃仕簡奏言附郡沿山各處有賊匪蜂擁甚多隨命官兵先赴四路搜追堵禦保固府城緣匪黨聚散靡常聞風各竄臣隨復遣兩路官兵進剿北路遊擊楊起麟等十八日由鐵線橋行至下加

冬地方見有賊匪百餘人隨即奮力追殺生擒賊匪鄭發等六名并奪獲刀械等項審明正法又拏獲賊夥王鑑等六名南路總兵郝壯猷於十九日過大湖一帶地方有賊匪數千人前來禦敵隨督率弁兵施放鎗砲自己刺至申刻打死賊匪三百餘人官兵奮勇追趕生擒賊夥二十五人訊明正法昏暮劄營賊匪復來撲營被官兵鎗砲打死百餘人賊夥退遁又據北路總兵柴大紀咨報正月

二十一日在外山部竹地方鎗砲打死賊匪甚多
生擒偽護駕大將軍廖東一名賊徒陳模黃啟吳
章等二十一名二十二日已時抵田洋生獲賊匪
林老併番婦留娘等共八十二名拏獲偽軍師侯
辰一名併奪獲鎗砲火藥鉛子馬匹刀械等項守
備邱能成攻開城門賊匪由北門而逸隨將城內
賊匪搜拏淨盡該總兵親往街市安民俟搜捕近
庄事畢即統兵前往彰屬勸洗大里杙又郝壯猷

咨報正月二十一日探得賊匪約有三四千人窩聚在西園庄地方隨派令遊擊蔡攀龍叅將瑚圖里副將丁朝雄等分三路夾攻用連環鎗打死賊匪三百餘人賊即奔逃搶獲鎗砲器械旗單等項隨將賊巢草寮數百間焚燬查南路鳳山一帶山徑錯雜該總兵帶領官兵由中路之大湖進剿而東路之大岡山小岡山尤為賊匪屯聚之藪必須添兵前進方為得力二十三日督臣調委汀州鎮

總兵普吉保同興化協副將格綢額復帶水師提
標兵丁六百名到臺臣即於二十四日遣發將弁
帶領前赴大小岡山聽總兵郝壯猷調度務將南
路賊匪迅行剿除併將首匪各要犯嚴速擒解不
使一名漏網臣現在南北之要衝隨時應援

同日常青奏言准陸路提臣任承恩咨報拏獲奸
細僧人西葉等三名訊知林爽文已潛回大里杙
庄隨派令遊擊海亮等設卡防守及二十二日該

遊擊等堵禦殺賊并首惡未擒恐致蔓延必須添
兵進剿伏思賊人退守巢穴匪類自必衆多若非
合兵剿洗計出萬全則賊衆兵單不能得力臣正
在揆度機宜飛咨妥辦旋准水師提臣黃仕簡來
咨總兵柴大紀進剿北路擒獲賊夥收復諸羅縣
城總兵郝壯猷進兵南路屢得勝仗現至大湖進
剿尚須添兵前進查該提臣黃仕簡派撥官兵分
路收剿未及旬日之間既已收復諸羅即可直達

彰化與陸路提

臣

聲勢相援而南路之鳳山又經

總兵郝壯猷將賊匪攻散恢復已在指日至內地

派出官兵惟徐鼎士所帶之千五百名屢因風阻

現在據報陸續前赴淡水其續調之延津福寧等

營官兵二千名此時俱可先後抵臺兵力已厚定

可迅速蕆功再粵省撥赴潮州兵二千名

臣

因漳

州一帶地方緊要暫請留駐今臺地已報有捷音

內境均極寧謐潮州之兵似可毋庸再行留駐已

咨會兩廣督

臣

一併飭令歸伍均奏入

上命軍機大臣傳諭常青黃仕簡任承恩曰任承恩既探知賊首林爽文潛回巢穴自應多帶弁兵親往擒捕乃分派遊擊都司等零星堵禦殺賊甚少而千總葉榮等轉被賊鎗傷陣亡更屬不成事體從來行軍制勝合則勢強分則勢弱況閩人性本剽輕若令零星打仗輕於嘗試轉恐挫失氣餒朕屢降諭旨甚明任承恩豈不之知而乃輕分兵力以致損失威重乎

前此署都司易連署守備陳邦光以微末員弁尚能督率兵民鄉勇等多殺賊衆收復鹿港彰化竹塹等處任承恩到彼後惟就已得之處駐劄觀望僅以派員堵禦了事是誠何心任承恩著嚴行申飭至黃仕簡前以所奏南北二路殺獲賊匪情形亦係接據總兵柴大紀郝壯猷咨報並未躬率士卒迅速追剿黃仕簡所辦何事大非向日嘉予期望之意亦著嚴行申飭伊二人俱不免遲延觀望而任承恩為尤甚恐

於剿捕不能得力常青速渡臺灣遵照節次所降諭旨實力督拿以期一舉殲事朕於軍務從來賞罰嚴明其奮勇出力者必優加甄錄而畏葸退縮者亦必重治示懲黃仕簡任承恩等寧未聞知豈可自蹈重愆以致百身莫贖乎並著常青詳悉諭知該提督等俾各知儆惕以期帶罪圖功奮勉集事

上又命軍機大臣傳諭李侍堯常青曰賊匪廖東侯辰俱受林爽文偽封名號看來賊首林爽文肆逆不法

或竟有自稱為王及僭立年號之事林爽文胆敢糾衆戕官佔奪縣城已屬罪大惡極若果有此等偽僭名號該督即應據實奏聞正可明正其罪無所用其諱飾也所有現獲之廖東侯辰二犯著即派委妥員解京審辦守備卬能成奮勇當先攻開諸羅城門並將城內餘匪殲盡甚屬可嘉著該督於事竣後送部引見此次柴大紀於官兵未到之先能督率兵民極力守禦郡城現在帶兵赴北路搜剿又能多殲賊衆

收復縣城并生獲要犯甚屬出力著常青抵臺灣後
先行嘉獎惟是臺灣係該鎮專管地方今有此賊匪
聚衆不法之事該鎮本有應得之咎若能及此時勇
往剿捕豈止可以將功抵過朕必將伊從優議敘至
任承恩正值年富力強且自請前往剿賊乃亦逡巡
觀望並著常青到彼察訪實在情形如任承恩尚知
出力或有需該提督在彼協剿之處即令任承恩暫
留臺灣隨同搜捕俟事竣後再核其功過據實具奏

倘於剿捕不能得力即遵照前旨一面令其來京陛見一面據實叅奏常青固不必因有此旨過事吹求亦不可稍存瞻徇迴護致令倖免其功過大概朕已知悉常青亦不能欺朕為好人也

同日徐嗣曾奏言

臣

前因官兵阻風未渡輒親赴

閩安查催實屬知識短淺不權事理輕重現在兩提臣分投搜剿賊匪自必立就殲滅此時沿海各口岸尤宜喫緊防範實臣分內應辦最要之事節

經諄飭嚴緝本日據署漳浦縣羅澤坤盤獲匪犯

陳傍即陳榜供認在臺從逆因病潛回現解赴督

臣究辦查該縣前曾獲犯陳樵經督臣審明正法

今又拏獲陳榜一名可見賊匪竄回自必不少現

復嚴飭文武員弁加意堵截查拏不致稍有疎忽

自干重咎至臣前准督臣札會審辦逆匪高文麟

等犯究出起會根由係平和人嚴烟即莊烟過臺

興起囑臣一體留心密查嚴烟籍隸漳州恐其已

回原籍當即密飭查拏尚未報獲現又嚴飭密速訪緝仍令不動聲色妥協辦理再現據漳浦縣訪獲天地匪會黃斷等十二犯雖據訊稱係糾約資助葬費並無為匪不法情事但有無不實不盡現已提省嚴行究辦茲又接准兩廣督臣咨會拏獲匪犯許阿協等究出該犯等先後到漳經平和縣人賴阿邊龍溪縣人梁阿步等糾其入會臣已密札汀漳道朱芄會留心訪緝鎮靜妥辦毋使兔脫奏

八

上命軍機大臣傳諭徐嗣曾曰前因臺灣賊匪滋事之初督臣既經前往泉州駐劄該撫自當在省靜鎮彈壓乃徐嗣曾有前往閩安之奏是以降旨申飭今臺灣賊匪業經兩提臣會兵搜剿縣城早經收復賊匪紛紛潰散大局已定偷越內地餘匪正復不少則此時情形又與前日不同嚴拏逸匪最為緊要該撫又應往來沿海各口岸親自督率擒拏不使一名漏網方

合機要況省城距廈門一帶不遠就近往來仍可回
省辦理一切兩不致悞乃徐嗣曾拘泥前旨將搜捕
餘匪等事僅委之文武員弁該撫轉安坐省城何總
不知事體輕重緩急若此徐嗣曾著再傳旨申飭該
撫接奉此旨即速赴海口一帶親自往來查察務將
偷越餘匪嚴密截拏勿稍留餘孽

臣等謹按事有輕重緩急貴於變通隨時林爽文
起事之初內地民人自必聞風疑懼我

皇上於撫

臣

徐嗣曾前往閩安之奏深責其非蓋以過

涉張皇恐致民情惶惑也及兩提督渡臺賊匪紛
紛逃散此信播聞即愚民皆知賊夥之易除不復
更有他慮得撫臣親往海口督拏逸匪自必更為
得力

聖天子揆幾度務隨時變通

特授機宜不設成心惟期其是益見

聖謨廣運悉協時中也

十八日丙辰藍元枚奏言二月初五日督臣常青等

咨稱逆匪林爽文等南北蔓延派撥官兵分路剿捕經柴大紀獲賊黃余等四名審明正法楊起麟在下加冬地方生擒賊匪鄭發等六名獲賊夥王鑑等六名又郝壯猷在大湖一帶地方殺賊匪四百餘人生擒二十五人訊明正法理合奏明

同日徐嗣曾奏言黃仕簡等獲偽將軍廖東等收復諸羅林爽文現已潛回大里杙莊柴大紀收復

諸羅之後即可前赴彰化一帶與提臣任承恩并
力夾攻而南路鳳山一帶現又經提臣黃仕簡添
派總兵普吉保帶兵馳赴大小崗山聽總兵郝壯
猷調度不日亦可得有收復信息臣嚴飭沿海地
方實力堵拿不使一名竄逸漏網均奏入

上命軍機大臣傳諭李侍堯常青徐嗣曾曰本日藍元
枚徐嗣曾奏到各摺皆係常青黃仕簡等業經奏到
之事乃各用六百里馳奏徒勞驛站甚屬無謂嗣後

該提督等拏獲逸犯等事應行奏聞者仍令專摺具奏外若不過接准臺灣提鎮咨報搜勦情形業經督臣提臣馳奏者均毋庸重複聲叙由驛奏報以省煩擾至常青此時自己親渡臺灣督率鎮將等實力搜剿但常青已經調任湖廣總督今以欽差前往督辦一切題陞調補若專俟本省總督李侍堯辦理則所統將弁等見常青不能專主或心中以為即奮勉出力亦不能即邀拔擢未免稍生懈怠著傳諭常青現

在臺灣將弁被賊戕害多有懸缺未補者常青到彼即應於剿賊弁兵内核其實在出力者官則酌予陞擢兵則拔補千把一而具奏一面知會李侍堯俾常青得有事權以便策勵將卒呼應較靈可期迅速集事

臣等謹按將帥之整肅戎行因事權之專一也督臣常青以湖廣總督督師臺灣使一切題陞調補必咨明本省督臣辦理將弁等見其不能專主必

致心生懈怠

皇上曲體人情明無不矚

特降諭旨令常青於軍營懸缺皆得酌量陞補不使少
有掣肘真鼓勵人才之要道也

十九日

丁巳

上諭內閣曰福建臺灣逆匪林爽文等聚衆滋事一案
節經該提鎮等奏報剿捕情形摺內據稱賊匪蜂擁
團聚各有萬餘及數千不等竟似現在賊衆已不下

數萬而所奏每次打仗殺賊之數或稱數百或稱無數又似被殺之賊已不下數千賊人倉猝起事其糾約黨羽及沿途被脅入夥者何能即至數萬之多此必綠營將弁畏懼無能捏詞多報既可掩其怯懦又可藉以冒功不知被殺之賊俱有首級耳記屍身可驗而黨羽之多寡將來生擒林爽文等亦無難跟究確數著常青于剿捕事竣後務將所報賊數與所殺所拏賊數詳細核查據實具奏毋任朦混至林爽文

等攻犯城池戕害官民罪大惡極不特首要各犯罪
應寸磔即入其黨夥者均屬法無可貸但現在賊衆
雖未必如該提鎮等所報之多而林爽文等到處煽
惑糾結為日稍久看此情形人數亦當有萬餘其中
被賊逼脅附從者想亦不少若概予駢誅朕心有所
不忍著常青于官兵勦捕時臨陣痛加殲戮不計外
其續行搜獲暨賊黨畏懼縛獻乞降之犯著該督逐
加審明此內如受賊偽職及曾戕害抗拒官兵者仍

當即行正法其止于被脅隨行並未與官兵打仗者
尚可免其一死量子遠徙該督其恪遵妥辦以副朕
仰體

上天好生之德法外施仁至意

臣等謹按臺匪滋事焚掠村庄到處脅從遂至蜂
屯蟻聚論以叛逆之條皆屬法所難宥者我

皇上不忍概予駢誅

特命于搜獲乞降之犯分別其未受偽職及未與官兵

打仗者免死發遣

皇仁浩蕩於萬無可貸之中尚求其一綫可生之路容
保無疆非所謂與

天合德者歟

上又命軍機大臣傳諭常青李侍堯曰現在臺灣勦捕
官兵節據常青奏報先後調派共計一萬二千餘名
軍威已極壯盛任承恩等並不親臨行陣僅派委將
弁零星打仗致首惡潛匿稽誅轉以賊勢蔓延必須

添兵進剿為辭可見任承恩懦怯無能不過藉此以掩飾其遷延觀望之咎昨已降旨嚴行申飭著再傳諭常青于到臺灣時遵照前旨留心查察據實嚴叅無得稍有瞻徇計此時兵力已足更無庸再議添兵至現在大兵四路會勦賊人勢在危急其有擒獲賊目割取首級呈獻及臨陣乞降者已諭令常青分別查辦果係被賊脅從尚可寬以一綫分別發遣新疆等處給厄魯特兵丁為奴但此時賊黨尚多此等匪

徒目前冀緩誅戮恐有挾詐偽降情事尤應嚴密防範並著常青察看確情慎重辦理毋得稍有疎忽所謂受降如受敵不可不知也

上又諭內閣曰臺灣賊匪林爽文滋事一案署都司事守備易連守備卬能成署守備事千總陳邦光于克復諸羅生擒要犯及保護鹿港新庄等處俱能率領兵民奮勇出力甚屬可嘉所有現出臺灣鎮標中營遊擊耿世文員缺即著易連補授左營遊擊李中揚

員缺即著邱能成補授北路協都司王宗武員缺即著陳邦光補授伊等率衆爭先收復擒拏是以逾格超擢用示優獎其臺灣北路協副將赫生額及諸羅守備郝輝龍員缺仍著常青于帶兵各員內擇其功績最著者酌量奏請陞補以昭獎勸

欽定平定臺灣紀畧卷七